

**1116**

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona”, br. 7/97 i 3/99 i „Službene novine Tuzlanskog kantona”, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 27.12.2024. godine, donosi

## **Z A K O N**

### **O IZVRŠENJU BUDŽETA TUZLANSKOG KANTONA ZA 2025. GODINU**

**I. OPĆE ODREDBE**

#### **Član 1.** **(Predmet)**

Ovim zakonom uređuje se struktura prihoda i primitaka te rashoda i izdataka, izvršavanje, prioriteti plaćanja, obim zaduživanja i garancija, upravljanje javnim dugom, te finansijskom i nefinansijskom imovinom, prava i obaveze korisnika budžetskih sredstava, ovlaštenja Vlade Tuzlanskog kantona (u daljem tekstu: Vlada Kantona), Ministarstva finansija Tuzlanskog kantona (u daljem tekstu: Ministarstvo finansija) i ministra finansija Tuzlanskog kantona (u daljem tekstu: ministar finansija) u izvršavanju Budžeta Tuzlanskog kantona za 2025. godinu (u daljem tekstu: Budžet), kazne za neispunjenje obaveza, te druga pitanja u izvršavanju Budžeta.

#### **Član 2.** **(Registar budžetskih korisnika)**

(1) Registar budžetskih korisnika uspostavlja i vodi Ministarstvo finansija, po propisanoj budžetskoj klasifikaciji u skladu s propisom koji donosi Federalno ministarstvo finansija.

(2) Budžetski korisnici su ministarstva, drugi organi uprave, upravne organizacije i ostali čije je finansiranje iz Budžeta predviđeno važećim propisom (u daljem tekstu: korisnici).

(3) Korisnik koji u svom budžetskom razdjelu sadrži potrošačke jedinice - glave, budžetski je za njih nadležan.

#### **Član 3.** **(Važenje)**

(1) Budžet se odnosi i važi za fiskalnu 2025. godinu (u daljem tekstu: fiskalna godina).

(2) Fiskalna godina počinje 1. januara, a završava 31. decembra 2025. godine.

**II. BUDŽETSKI PRINCIPI**

#### **Član 4.** **(Načela Budžeta)**

Izrada i izvršavanje Budžeta zasniva se na načelima jedinstva, tačnosti, uravnoteženosti i zakonitosti Budžeta, načela jedne godine, načela univerzalnosti, efikasnosti, ekonomičnosti i transparentnosti.

#### **Član 5.** **(Namjena sredstava Budžeta)**

(1) Sredstva Budžeta koriste se za finansiranje poslova, funkcija i programa organa Tuzlanskog kantona (u daljem tekstu: Kanton), kao i drugih korisnika, te prava primalaca sredstava Budžeta utvrđenih zakonima i drugim propisima donesenim na osnovu zakona.

(2) Propisi koji imaju finansijske posljedice na Budžet moraju biti obrazloženi, odnosno opravdani analizom troškova i koristi.

#### **Član 6.** **(Iskazivanje prihoda i primitaka)**

(1) Svi prihodi i primici, rashodi i izdaci iskazuju se u Budžetu po bruto načelu.

(2) Budžet mora biti uravnotežen tako da ukupni prihodi i primici pokrivaju ukupne rashode i izdatke.

(3) Prihodi i primici služe za podmirivanje rashoda i izdataka, osim ako ovim zakonom nije drugačije propisano.

(4) Korisnici mogu preuzeti obaveze na teret Budžeta tekuće godine samo za namjene i do visine utvrđene u posebnoj dijelu Budžeta, ako su za to ispunjeni svi zakonom i drugim propisima utvrđeni uslovi.

#### **Član 7.** **(Donošenje Budžeta)**

(1) Budžet usvaja Skupština Tuzlanskog kantona (u daljem tekstu: Skupština Kantona) za budžetsku godinu koja odgovara kalendarskoj godini, prije početka godine na koju se odnosi.

(2) Uz Budžet, iz stava (1) ovog člana, donosi se Zakon o izvršenju Budžeta, kojim se uređuje struktura prihoda i primitaka, te rashoda i izdataka Budžeta i njegovo izvršenje, prioriteti plaćanja, obim zaduživanja i izdavanje garancija, upravljanje dugom, te finansijskom i nefinansijskom imovinom, prava i obaveze korisnika budžetskih sredstava, ovlaštenja Vlade Kantona, Ministarstva finansija, i ministra finansija u izvršenju Budžeta za tekuću godinu, kazne za neispunjenje obaveza, te druga pitanja vezana za izvršavanje Budžeta.

#### **Član 8.** **(Donošenje novih propisa)**

(1) Prijedlozi zakona i drugih propisa i akata planiranja moraju sadržavati izjavu o fiskalnoj procjeni posljedica na Budžet iz koje se mora vidjeti povećavaju li se ili smanjuju prihodi ili rashodi Budžeta.

(2) Izjava o fiskalnoj procjeni posljedica na Budžet mora obuhvatiti:

a) predviđene prihode i rashode, te primitke i izdatke Budžeta za budžetsku godinu i za dvije naredne godine;

b) prijedloge za pokrivanje povećanih rashoda i izdataka Budžeta;

c) prijedloge za pokrivanje smanjenih prihoda i primitaka;

d) mišljenje Ministarstva finansija.

(3) Ako se tokom godine donesu zakoni i drugi propisi i akti planiranja na osnovu kojih nastaju nove obaveze za Budžet, sredstva će se obezbijediti u budžetu za sljedeću budžetsku godinu u skladu sa projekcijama i mogućnostima.

**III. SADRŽAJ BUDŽETA**

#### **Član 9.** **(Struktura Budžeta)**

(1) Budžet se sastoji od općeg i posebnog dijela i pregleda višegodišnjih kapitalnih ulaganja.

(2) Opći dio Budžeta čine: Račun prihoda i rashoda, Račun kapitalnih primitaka i izdataka i Račun finansiranja na nivou ukupnog Budžeta.

(3) Posebni dio Budžeta sastoji se od plana rashoda i izdataka korisnika, iskazanih po ekonomskoj, funkcionalnoj i klasifikaciji prema izvorima finansiranja, definisanim u članu 14. Zakona o budžetima u Federaciji Bosne i Hercegovine („Službene novine Federacije BiH”, br. 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22), (u daljem tekstu: Federalni zakon) u skladu s aktima strateškog planiranja, ciljevima i zadacima korisnika.

(4) Pregled višegodišnjih kapitalnih ulaganja iz programa javnih investicija, prikazuje ukupnu vrijednost ulaganja po godinama i po svim izvorima finansiranja.

### Član 10. (Budžetska klasifikacija)

Prihodi, primici, rashodi i izdaci Budžeta iskazuju se prema budžetskim klasifikacijama.

## IV. IZRADA BUDŽETA

### Član 11. (Budžetski kalendar)

Budžet se priprema i usvaja prema budžetskom kalendaru.

### Član 12. (Dokument okvirnog budžeta)

(1) Dokument okvirnog budžeta (u daljem tekstu: DOB) je akt koji sadrži makroekonomske projekcije, te okvirne projekcije budžetskih prihoda i primitaka te rashoda i izdataka, te utvrđene gornje granice po korisnicima za planiranje budžeta za naredne tri godine, na kojem se zasniva priprema i izrada godišnjih budžeta.

(2) Postupak pripreme i izrade DOB-a provodi se po proceduri i u rokovima utvrđenim Federalnim zakonom.

(3) Trogodišnje planiranje budžeta obaveza je za sve korisnike.

(4) Uz DOB se kao aneks dokumentu prilažu i trogodišnji finansijski planovi javnih preduzeća kod kojih je učešće javnih prihoda u ukupnim prihodima više od 50%, kao i preduzeća za koja je Ministarstvo finansija izdalo garancije za zaduživanje.

### Član 13. (Smjernice ekonomske i fiskalne politike)

(1) Vlada Kantona, na prijedlog Ministarstva finansija, donosi smjernice ekonomske i fiskalne politike za trogodišnji period.

(2) Smjernice sadrže:

a) strateške ciljeve ekonomske i fiskalne politike Kantona i usklađene prioritete rashoda i izdataka, uključujući prioritete strukturalne reforme;

b) osnovne makroekonomske pokazatelje Kantona;

c) osnovne pokazatelje ekonomske i fiskalne politike Kantona,

d) pretpostavke društvenog i privrednog razvoja za budžetsku i naredne dvije godine;

e) procjenu prihoda i primitaka budžeta, ciljanu fiskalnu poziciju te usklađeni nivo ukupnih ciljanih rashoda i izdataka, a koji održavaju prethodno navedene prioritete rashoda i izdataka;

f) predviđene promjene javnog duga i strategiju upravljanja javnim dugom.

(3) Prijedlog Smjernica iz stava (1) ovog člana Ministarstvo finansija dužno je dostaviti Vladi Kantona do 15. maja tekuće godine. Vlada Kantona donosi smjernice do 31. maja tekuće godine, nakon čega se iste objavljuju na web stranici Ministarstva finansija.

### Član 14. (Usvajanje DOB-a)

(1) Na osnovu prijedloga prioriteta korisnika za izradu DOB-a, Ministarstvo finansija priprema DOB i dostavlja Vladi Kantona do 15. juna.

(2) U slučaju nedostavljanja pregleda prioriteta korisnika, u roku određenom budžetskom instrukcijom broj 1, Ministarstvo finansija je ovlašteno da, u skladu s dostavljenim pregledom prioriteta korisnika iz prethodne fiskalne godine, sačini pregled prioriteta za tog korisnika.

(3) Vlada Kantona razmatra i usvaja DOB do 30. juna tekuće godine, uključujući DOB-om definisane ukupne gornje granice rashoda po programima, na osnovu kojih su definisane ukupne

gornje granice na nivou svakog korisnika, za tri godine, nakon čega se DOB dostavlja Skupštini Kantona kao informacija i objavljuje na web stranici Ministarstva finansija.

(4) U slučaju da Vlada Federacije Bosne i Hercegovine ne usvoji DOB u roku iz člana 15. Federalnog zakona, Vlada Kantona će usvojiti DOB Kantona u roku iz stava (3) ovog člana i isti će, u slučaju potrebe, revidirati nakon što Vlada Federacije Bosne i Hercegovine usvoji DOB Federacije Bosne i Hercegovine.

### Član 15. (Podnošenje budžetskih zahtjeva)

Za podnošenje finansijskih zahtjeva korisnika na osnovu Smjernica ekonomske i fiskalne politike iz člana 13. ovog zakona, sadržaj budžeta i programe javnih investicija Kantona primjenjuju se odredbe Federalnog zakona kojim su uređena ova pitanja.

## V. USVAJANJE BUDŽETA

### Član 16. (Usvajanje budžeta)

(1) Nakon razmatranja i utvrđivanja od strane Vlade Kantona, Vlada Kantona dostavlja Skupštini Kantona nacrt budžeta za sljedeću fiskalnu godinu, najkasnije do 5. novembra tekuće godine.

(2) Uz nacrt budžeta Skupštini Kantona se podnosi i DOB kao informacija.

(3) Sve izmjene i dopune, koje Skupština Kantona prihvati putem amandmana na predloženi budžet, ne smiju preći iznos utvrđene gornje granice rashoda i izdataka.

(4) Amandmani kojima se predlaže povećanje budžetskih rashoda i izdataka iznad iznosa utvrđenih prijedlogom budžeta, mogu se prihvatiti pod uslovom da se istovremeno predloži smanjenje drugih rashoda i izdataka u posebnom dijelu budžeta.

(5) Skupština Kantona usvaja budžet do 31. decembra tekuće godine.

### Član 17. (Pribavljanje mišljenja)

(1) Ministarstvo finansija, prije dostavljanja nacrta, odnosno prijedloga budžeta Vladi Kantona, obavezno je pribaviti mišljenje Federalnog ministarstva finansija u vezi s planiranim prihodima i primicima i primjene fiskalnog pravila iz člana 43. Federalnog zakona.

(2) Mišljenje iz stava (1) ovog člana prilaže se uz nacrt, odnosno prijedlog budžeta.

### Član 18. (Dostavljanje budžeta)

Ministarstvo finansija dostavlja Budžet Kantona, budžet gradova i općina i finansijske planove vanbudžetskih fondova Federalnom ministarstvu finansija u roku od 15 dana od dana njihovog donošenja.

### Član 19. (Privremeno finansiranje)

(1) Ukoliko Skupština Kantona ne usvoji budžet prije početka fiskalne godine, privremeno finansiranje vrši se u skladu sa odredbama člana 35. Federalnog zakona.

(2) Za vrijeme privremenog finansiranja, u smislu stava (1) ovog člana, primjenjuju se odredbe Zakona o izvršenju budžeta Tuzlanskog kantona za prethodnu fiskalnu godinu i propisi doneseni na osnovu tog zakona.

(3) U periodu privremenog finansiranja korisnici ne smiju povećavati broj zaposlenih u odnosu na stanje na dan 31. decembar prethodne godine.

(4) Izuzetno, za korisnike iz oblasti osnovnog i srednjeg

obrazovanja, pod novim zapošljavanjem u smislu stava (3) ovog člana ne podrazumijevaju se zapošljavanja u slučaju zamjene zaposlenika odsutnog zbog privremene spriječenosti za rad - bolovanja, korištenja zakonskih prava prije odlaska u penziju i zbog okončanja konkursne procedure u toku perioda privremenog finansiranja.

#### Član 20.

##### (Privremene mjere za uravnoteženje Budžeta)

(1) Ako se u toku budžetske godine, zbog nastanka novih obaveza za Budžet ili promjena privrednih kretanja, povećaju rashodi i/ili izdaci, odnosno smanje prihodi i/ili primici Budžeta, Vlada Kantona može, na prijedlog Ministarstva finansija, donijeti odluku o obustavljanju izvršavanja pojedinih rashoda i/ili izdataka u trajanju do 45 dana.

(2) Mjerama privremenog obustavljanja izvršavanja, Vlada Kantona može:

- a) zaustaviti preuzimanje obaveza i/ili,
- b) predložiti produženje ugovorenih rokova plaćanja i/ili
- c) zaustaviti preraspodjelu budžetskih sredstava, potrebnu radi preuzimanja obaveza.

(3) Izuzetno, uz mjere iz stava (2) ovog člana, Vlada Kantona može donijeti odluku da korisnici mogu sklapati ugovore o nabavi roba i usluga, uz prethodnu saglasnost Ministarstva finansija.

(4) O odluci iz stava (1) ovog člana Vlada Kantona mora obavijestiti Skupštinu Kantona odmah nakon donošenja odluke.

#### Član 21.

##### (Izmjene i dopune Budžeta)

(1) Ako se za vrijeme provođenja mjera privremene obustave izvršavanja Budžeta, Budžet ne uravnoteži, vrše se izmjene i dopune Budžeta.

(2) Vlada Kantona mora, u roku 15 dana prije isteka roka za privremenu obustavu izvršavanja Budžeta, predložiti Skupštini Kantona izmjene i dopune Budžeta.

(3) U slučaju povećanja prihoda Ministarstvo finansija može odlučiti da započne s postupkom izmjena i dopuna Budžeta.

(4) Izmjene i dopune Budžeta vrše se po postupku za usvajanje Budžeta.

(5) U toku postupka izmjena i dopuna Budžeta, Vlada Kantona može, na prijedlog ministra finansija, produžiti privremenu obustavu izvršavanja pojedinih izdataka.

(6) Izmjenama i dopunama Budžeta ponovo se uravnotežuju prihodi i primici, odnosno rashodi i izdaci Budžeta.

#### Član 22.

##### (Pravila jačanja fiskalne odgovornosti)

(1) U slučaju stvaranja obaveza s dospijućem iznad visine planirane Budžetom, visina finansijskog plana korisniku u sljedećoj budžetskoj godini umanjit će se za iznos stvorenih obaveza iznad visine planirane Budžetom.

(2) Prijedlozi zakona, uredbi, propisa i drugih akata, koje Vlada Kantona donosi ili predlaže na donošenje Skupštini Kantona, moraju sadržavati procjenu finansijskih efekata na Budžet, kao i mišljenje Vlade Kantona, ako Vlada Kantona nije predlagač zakona.

(3) Tokom izvršavanja Budžeta, Ministarstvo finansija može obavljati finansijsku kontrolu zakonitog i namjenskog korištenja budžetskih sredstava.

(4) Kontrolu iz stava (3) ovoga člana obavljaju lica ovlaštena od ministra finansija.

#### Član 23.

##### (Tekući deficit)

(1) Planirani tekući bilans Budžeta mora biti pozitivan ili jednak nuli izuzev u slučajevima elementarne nepogode ili

stanja prirodne katastrofe koje proglasi Skupština Kantona, i to u slučaju kada visina utvrđenih šteta dosegne ili premaši 20% ostvarenih rashoda u prethodnoj fiskalnoj godini.

(2) Ostvareni deficit iz prethodnih godina, Vlada Kantona je dužna pokriti planiranjem sredstava u budžetu za pokriće ostvarenog deficita u narednih pet fiskalnih godina.

(3) Procedure zaduživanja i odobravanja od strane Federalnog ministarstva finansija moraju se provoditi u skladu sa odredbama Zakona o dugu, zaduživanju i garancijama u Federaciji BiH („Službene novine Federacije BiH”, br. 86/07, 24/09, 44/10 i 30/16).

#### Član 24.

##### (Izjava o fiskalnoj odgovornosti)

(1) Rukovodilac korisnika je odgovoran za:

a) zakonito i namjensko korištenje sredstava i  
b) efikasno i uspješno funkcionisanje sistema finansijskog upravljanja i kontrolu u okviru Budžetom utvrđenih sredstava.

(2) Rukovodilac je dužan svake godine za prethodnu budžetsku godinu, za razdoblje u kojem je obavljao poslove rukovodioca, popuniti Izjavu o fiskalnoj odgovornosti (u daljem tekstu: Izjava).

(3) Uz Izjavu se prilažu i planovi otklanjanja slabosti i nepravilnosti utvrđeni od strane nadležnih organa, izvještaj o otklonjenim slabostima i nepravilnostima utvrđenim u prethodnoj godini i mišljenje internih revizora o sistemu finansijskog upravljanja i kontrola za oblasti koje su bile revidirane u prethodnoj godini.

(4) Rukovodioci korisnika Izjavu dostavljaju ministrima ili rukovodiocima drugih organa uprave, na nivou razdjela organizacijske klasifikacije.

(5) Ministri i rukovodioci drugih organa uprave Izjavu dostavljaju Ministarstvu finansija koje provjerava njezin sadržaj.

## VI. IZVRŠAVANJE BUDŽETA

#### Član 25.

##### (Napлата prihoda)

(1) Korisnici su odgovorni za potpunu i blagovremenu naplatu prihoda i primitaka iz svoje nadležnosti, za njihovu uplatu u Budžet i za izvršavanje svih rashoda i izdataka u skladu s namjenama.

(2) Korisnik je dužan provesti sve zakonom propisane radnje u cilju naplate potraživanja po osnovu ugovora ili bilo kojeg drugog potraživanja po osnovu javnih prihoda.

(3) Za nenaplativa potraživanja Vlada Kantona, na obrazloženi prijedlog korisnika, može donijeti odluku o otpisu potraživanja.

(4) Korisnici su odgovorni za zakonito, namjensko, efikasno i ekonomično raspolaganje budžetskim sredstvima.

(5) Dodjela sredstava iz Budžeta u obliku subvencija (grantova) i drugih vrsta javnih rashoda, kao i umanjeno ostvarenje prihoda Budžeta u obliku otpisa ili preuzimanja dugovanja, dodjeljivanja zajmova, kredita s preferencijalnim kamatnim stopama i druge vrste pomoći kojima se privredni subjekt dovodi u povoljniji položaj u pogledu tržišne konkurencije u odnosu na ostale subjekte na tržištu, vršit će se u skladu sa Zakonom o sistemu državne pomoći u Bosni i Hercegovini („Službeni glasnik BiH”, br. 10/12 i 39/20) i podzakonskim aktima donesenim na osnovu istog.

#### Član 26.

##### (Nalogodavci i naredbodavci)

(1) Nalogodavce za izvršenje Budžeta po odobrenim budžetskim pozicijama određuje Vlada Kantona posebnom odlukom.

(2) Naredbodavac za finansijske planove Budžeta po odobrenim budžetskim pozicijama su Vlada Kantona, premijer Tuzlanskog kantona, ministri i rukovodioci drugih korisnika iz člana 2. stav (2) ovog zakona.

#### Član 27.

##### (Jedinstveni račun trezora)

(1) Obavljanje platnih transakcija vrši se preko transakcijskih računa koji su sastavni dio Jedinstvenog računa trezora (u daljem tekstu: JRT).

(2) Prekoračenje na transakcijskom računu odobrava Vlada Kantona posebnom odlukom. Dozvoljeno prekoračenje ne može biti korišteno na dan 31.12. tekuće fiskalne godine.

(3) JRT može da ima više podračuna.

(4) Uputstvo za otvaranje podračuna donosi ministar finansija uz saglasnost Vlade Kantona.

(5) Sa JRT se ne može isplatiti ni jedan izdatak ukoliko nije odobren Budžetom.

#### Član 28.

##### (Namjenski prihodi i primici)

(1) Namjenski prihodi i primici Budžeta su pomoći, donacije, prihodi za posebne namjene, prihodi od prodaje ili zamjene imovine u vlasništvu Kantona i namjenski primici od zaduživanja, emisije vrijednosnih papira i prodaje dionica i udjela.

(2) Prihodi i primici iz stava (1) ovog člana uplaćuju se u Budžet.

(3) Namjenski prihodi i primici koji nisu iskorišteni u prethodnoj godini prenose se u Budžet za tekuću budžetsku godinu.

#### Član 29.

##### (Neplanirani prihodi i primici)

(1) Ako su namjenski prihodi i primici uplaćeni u iznosu manjem od planiranog u Budžetu, korisnik može preuzeti i plaćati obaveze samo u visini stvarno uplaćenih, odnosno raspoloživih sredstava.

(2) Uplaćene i/ili prenesene, a manje planirane pomoći, donacije i prihodi za posebne namjene, kao i transferi za posebne namjene između korisnika javnih sredstava mogu se izvršavati iznad iznosa planiranih u Budžetu, a do visine uplaćenih, odnosno prenesenih sredstava u skladu s Uputstvom o načinu korištenja uplaćenih i/ili prenesenih, a manje planiranih pomoći, donacija i prihoda za posebne namjene i transfera za posebne namjene između korisnika javnih sredstava iznad iznosa planiranih u Budžetu Tuzlanskog kantona („Službene novine Tuzlanskog kantona”, broj: 5/19).

(3) Uplaćeni vlastiti javni prihodi korisnika Budžeta, pomoći, donacije, prihodi za posebne namjene i primljeni tekući i kapitalni transferi evidentiraju se na kontu glavne grupe 391100 - razgraničeni prihodi - isti se koriste u skladu sa Uputstvom o načinu uplaćivanja i trošenja vlastitih javnih prihoda korisnika Budžeta Tuzlanskog kantona („Službene novine Tuzlanskog kantona”, broj: 6/24) i Pravilnikom o procedurama korištenja namjenskih prihoda, donacija i grantova („Službene novine Tuzlanskog kantona”, broj: 5/08).

(4) Organizacione jedinice fakulteti/akademija planiraju prihode od naučnoistraživačkog rada na posebnom potrošačkom mjestu u Budžetu, a primljene transfere i donacije koje ostvaruju fakulteti/akademija planiraju se na potrošačkom mjestu 24040001 - Univerzitet u Tuzli-, izuzev prihoda Rudarsko-geološko-građevinskog fakulteta ostvarenih po projektima RIS RESTORE, IPA RESPONSI I UNEP do njihovog okončanja.

#### Član 30.

##### (Nenamjensko korištenje sredstava)

Za iznos nenamjenski utrošenih sredstava u prethodnoj godini korisniku će se umanjiti budžetska sredstva u godini u kojoj je utvrđeno nenamjensko korištenje sredstava.

#### Član 31.

##### (Uplata prihoda)

(1) Svi javni prihodi i primici Budžeta, uključujući i vlastite prihode, uplaćuju se na depozitni račun javnih prihoda Budžeta i iskazuju po izvorima iz kojih potiču.

(2) Korisnici su odgovorni za blagovremenu naplatu potraživanja po osnovu vlastitih javnih prihoda, kao i preduzimanje svih mjera za njihovu realizaciju.

(3) Korisnici su obavezni da prilikom izrade svog dijela Budžeta, planiraju rashode koji će biti pokriveni iz vlastitih javnih prihoda.

(4) Na utvrđivanje vrste vlastitih javnih prihoda, kriterija za utvrđivanje vlastitih javnih prihoda, te načina, rokova i uslova za njihovu raspodjelu primjenjuje se Pravilnik o vrstama vlastitih javnih prihoda u Federaciji Bosne i Hercegovine („Službene novine Federacije BiH”, broj: 104/22).

(5) Vlastiti javni prihodi korisnika mogu se koristiti do kraja fiskalne godine ili do drugog roka utvrđenog aktom korisnika kojim se utvrđuje vrsta vlastitih javnih prihoda, kriteriji za utvrđivanje vlastitih javnih prihoda, te načini, rokovi i uslovi za njihovu raspodjelu, a neutrošeni dio prihoda postaje javni prihod.

#### Član 32.

##### (Evidencije)

Transakcije svih prihoda i izdataka i poslovne aktivnosti iz Budžeta evidentiraju se u skladu sa federalnim propisima i na osnovu njih donesenim propisima Kantona u Pomoćnim i Glavnoj knjizi trezora.

#### Član 33.

##### (Izvršavanje budžeta sa JRT)

(1) Budžet se izvršava u skladu s prilivom sredstava na JRT.

(2) Plaćanje obaveza iz osnova vanjskog i unutrašnjeg duga prioriteta je obaveza Kantona.

#### Član 34.

##### (Operativni planovi)

(1) Ministarstvo finansija, na osnovu godišnjih i kvartalnih planova novčanih tokova, iskazanih po mjesecima, dostavlja korisnicima instrukciju za izradu prijedloga operativnih planova rashoda i izdataka.

(2) Korisnici su dužni dostavljati prijedloge godišnjih, kvartalnih i mjesečnih operativnih planova u skladu s instrukcijom Ministarstva finansija.

(3) Korisnici mogu stvarati obaveze do visine sredstava odobrenih operativnim budžetom.

#### Član 35.

##### (Obračun plaća, naknada i drugih prava)

(1) Isplata bruto plaća i naknada, te naknada korisnicima prava po osnovu drugih zakona, na osnovu utvrđene osnovice, može se vršiti samo do visine planiranih sredstava u Budžetu za te namjene.

(2) U slučaju da su planirana sredstva u Budžetu za isplatu naknada iz stava (1) ovog člana manja od iznosa obračunatog primjenom utvrđene osnovice, primjenjivat će se koeficijent za obračun.

(3) Koeficijent iz stava (2) ovog člana izračunava se tako da se iznos sredstava koji je planiran u Budžetu za tekuću budžetsku godinu dijeli sa iznosom koji je obračunat na osnovu

utvrđene osnovice za obračun.

(4) Isplate mjesečnih novčanih primanja, izvršene u skladu s ovim članom, su definitivne i konačne.

### **Član 36. (Plaćanje obaveza korisnika)**

(1) Ministarstvo finansija vrši plaćanja obaveza svih korisnika.

(2) Svaki rashod i izdatak iz Budžeta mora se zasnivati na vjerodostojnoj knjigovodstvenoj ispravi kojom se dokazuje obaveza za plaćanje.

(3) Odgovorna osoba korisnika, prije potpisivanja knjigovodstvene isprave, mora provjeriti pravni osnov i visinu obaveze koja iz nje proizlazi.

(4) Ministarstvo finansija je ovlašteno za zaključivanje vanskudskih nagodbi s povjericima za obaveze nastale na teret budžetskih sredstava, pod uslovom da povjericima odustaju od cjelokupnog ili dijela potraživanja po osnovu zakonskih zatezних kamata ili troškova postupka.

(5) Ministarstvo finansija je ovlašteno za zaključivanje vanskudskih nagodbi ili protokola s jedinicama lokalne samouprave s područja Kantona za potraživanja zakonskih zatezних kamata dosuđenih u korist Budžeta i na teret Budžeta, kojim se uređuje način odgođenog izvršenja obaveze plaćanja, najduže na period do tri godine ili otpis cjelokupnog ili dijela obaveze. Na vanskudsku nagodbu ili protokol saglasnost daje Vlada Kantona.

(6) Vanskudska nagodba ili protokol iz stava (5) ovog člana kojim se uređuje otpis cjelokupnog ili dijela obaveze po osnovu zakonske zatezne kamate dosuđene u korist Budžeta, može se zaključiti pod uslovom da je jedinica lokalne samouprave izmirila obaveze prema Budžetu po osnovu utvrđenog glavnog duga.

(7) Avansna plaćanja na teret budžetskih sredstava, namjenskih sredstava i vlastitih prihoda mogu biti ugovorena u visini do 50% procijenjene vrijednosti ugovora, a za ugovore čija procijenjena vrijednost prelazi 80.000,00 KM bez PDV-a, korisnik je obavezan pribaviti bankovnu garanciju.

(8) Na postupak realizacije sredstava za projekte iz IPA fondova planiranih na JU Univerzitet u Tuzli primjenjuje se Uputstvo o postupku realizacije sredstava za projekte iz IPA fondova na JU Univerzitet u Tuzli, broj: 10/1-14-01139-1/19 od 01.07.2019. godine.

### **Član 37. (Stvaranje obaveza korisnika)**

(1) Korisnici ne smiju stvarati obaveze iznad iznosa odobrenog operativnog budžeta kroz operativne planove za tog korisnika.

(2) Rashodi i izdaci svakog korisnika ne mogu prelaziti iznose alociranih budžetskih sredstava odobrenih za svaki mjesec ili drugi vremenski period, koje je utvrdilo Ministarstvo finansija, osim uz saglasnost Ministarstva finansija.

(3) Ministar finansija ima pravo rješenjem obustaviti od izvršenja odluku koja je u suprotnosti sa ovim zakonom.

(4) Korisnici doznačenih transfera ili zajmova dužni su dostaviti izvještaj o namjenskom utrošku sredstava.

(5) U slučaju da korisnici iz stava (4) ovog člana ne dostave izvještaj o namjenskom utrošku sredstava neće imati pravo aplicirati za dodjelu sredstava u narednoj fiskalnoj godini.

### **Član 38. (Operativni budžeti)**

(1) Ministarstvo finansija donosi instrukciju o pripremanju i podnošenju operativnih budžeta korisnika.

(2) Korisnici pripremaju i podnose prijedloge operativnih budžeta Ministarstvu finansija.

(3) Prijedlozi operativnih budžeta obuhvataju rashode za svaki mjesec.

(4) Ministarstvo finansija izvještava korisnike o odobrenim operativnim budžetima.

(5) Ministarstvo finansija vrši usklađivanje odobrenih operativnih planova korisnika nakon donošenja odluka i rješenja o unutrašnjim preraspodjelama i izmjena i dopuna Budžeta.

(6) Korisnici su obavezni prije svakog novog zapošljavanja dobiti pismenu saglasnost Vlade Kantona. Pod novim zapošljavanjem u smislu ovog stava podrazumijevaju se zapošljavanja na određeno vrijeme, neodređeno vrijeme, zapošljavanja po osnovu svih vidova sufinansiranja, zapošljavanje pripravnika, a čije zapošljavanje podrazumijeva korištenje budžetskih i namjenskih sredstava i čiji se obračun plaća, naknada i dodataka vrši u Ministarstvu finansija.

(7) Izuzetno od stava (6) ovog člana, a u skladu sa članom 101. Zakona o srednjem obrazovanju i odgoju - prečišćen tekst („Službene novine Tuzlanskog kantona”, br. 10/20, 11/20, 8/21, 11/21, 22/21, 5/22, 6/22 - presuda US FBiH, 10/22, 11/22, 9/23 i 12/23) i članom 82. Zakona o osnovnom odgoju i obrazovanju - prečišćen tekst („Službene novine Tuzlanskog kantona”, br. 10/20, 8/21, 11/21, 22/21, 5/22, 6/22 - presuda US FBiH, 10/22, 11/22, 9/23 - presuda US FBiH i 12/23) saglasnost za novo zapošljavanje daje Ministarstvo obrazovanja i nauke.

(8) JU Univerzitet u Tuzli obavezan je prije svakog raspisivanja konkursa za izbor u naučno-nastavna i saradnička zvanja, bez zasnivanja radnog odnosa na fakultetima JU Univerzitet u Tuzli, dobiti saglasnost Vlade Kantona.

(9) Izuzetno od stava (6) ovog člana, pismenu saglasnost za novo zapošljavanje u oblasti pravosuđa, u slučaju odlaska u penziju zaposlenika, internog premještanja ili preuzimanja i privremenog preuzimanja zaposlenika, daje Ministarstvo pravosuđa i uprave, uz prethodno pribavljeno mišljenje Ministarstva finansija. Ministarstvo pravosuđa i uprave obavezno je odlučiti o davanju saglasnosti u roku od 8 dana od dana prijema zahtjeva korisnika.

### **Član 39. (Izvršavanje Budžeta)**

(1) U okviru iznosa odobrenih operativnim budžetima, korisnici izdaju zahtjev za plaćanje zajedno s neophodnom dokumentacijom i listom prioriteta po korisnicima i izdacima i vode evidenciju o budžetskim, odnosno platnim transakcijama koristeći podatke automatizovanog sistema Glavne knjige trezora, u skladu s instrukcijama Ministarstva finansija.

(2) Korisnici su dužni postupati u skladu sa odredbama Uputstva o izvršavanju Budžeta s Jedinstvenog računa Trezora („Službene novine Tuzlanskog kantona”, broj: 2/21).

(3) Korisnici su dužni obavijestiti dobavljače i druge zainteresovane strane, na njihov zahtjev, o stanjima njihovih obaveza i potraživanja.

(4) Ako se u toku godine ukine korisnik iz oblasti obrazovanja, neutrošena sredstva za njegove rashode i izdatke prenose se korisniku koji preuzima njegove poslove, o čemu odluku, na prijedlog Ministarstva obrazovanja i nauke, donosi Vlada Kantona.

(5) U slučaju iz stava (4) ovog člana, Vlada Kantona, na prijedlog Ministarstva obrazovanja i nauke, dužna je formirati komisiju za popis imovine, obaveza i potraživanja.

### **Član 40. (Rokovi korištenja aproprijacija)**

(1) Odobrene aproprijacije za fiskalnu godinu mogu se koristiti do 31. januara naredne godine.

(2) Aproprijacije se mogu prenositi u narednu fiskalnu

godinu za finansiranje kapitalnih projekata iz posebnih fondova.

(3) Aproprijacije u svrhe finansiranja višegodišnjih kapitalnih projekata, prenose se u narednu fiskalnu godinu prema iznosima i vremenskom rasporedu utvrđenom u DOB-u.

#### **Član 41.**

##### **(Prioriteti izvršavanja Budžeta)**

(1) Budžet će se izvršavati po sljedećim prioritetima:

- a) otplate kamata i duga Kantona,
- b) plaće i naknade troškova svih zaposlenih kod budžetskih korisnika,
- c) transferi za socijalnu politiku,
- d) transferi za BIZ,
- e) transferi za poljoprivredu,
- f) tekući transferi i kapitalni izdaci,
- g) ostalo.

(2) Izuzetno, Budžet će se izvršavati promjenom redosljeda prioriteta utvrđenih u stavu (1) ovog člana, kada to zahtijeva tekuća likvidnost ili druge okolnosti na koje Ministarstvo finansija ili Vlada Kantona ne mogu uticati.

#### **Član 42.**

##### **(Preraspodjele rashoda i izdataka)**

(1) Ministar finansija, na zahtjev korisnika, može donijeti rješenje o preraspodjeli sredstava na budžetskim stavkama:

- a) u visini do 10% ukupno odobrenih rashoda za tog budžetskog korisnika,
- b) izdataka za tog budžetskog korisnika.

(2) Preraspodjela iz stava (1) tačka a) ovog člana može se odobriti u okviru ekonomskog koda i između ekonomskih kodova kako slijedi:

- a) 611000 - plaće i naknade troškova zaposlenih do 10%
- b) 612000 - doprinosi poslodavca do 10%
- c) 613000 - izdaci za materijal, sitan inventar i usluge do 10%
- d) 614000 - tekući transferi i drugi tekući rashodi do 10%
- e) 615000 - kapitalni transferi do 10%
- f) 616000 - izdaci za kamate do 10%

(3) Preraspodjela iz stava (1) tačka b) ovog člana vrši se na poziciji 820000 - Kapitalni izdaci samo u okviru tog potrošačkog mjesta, i može se odobriti bez obzira na obim i vrstu izdataka koji se preraspodjeljuju.

(4) U okviru odobrenog Budžeta preraspodjela sredstava izuzetno je dozvoljena između budžetskih korisnika, o čemu odlučuje Vlada Kantona na prijedlog Ministarstva finansija.

(5) Uz zahtjev za preraspodjelu odobrenih sredstava, korisnik mora priložiti odgovarajuću dokumentaciju na osnovu koje se Ministarstvu finansija daju na uvid razlozi za dodatnim sredstvima na budžetskoj stavci koja se povećava do kraja godine, odnosno razlozi za smanjenje odobrenih budžetskih stavki.

(6) Izvršena preraspodjela sredstava iz stava (1) tačka a) ovog člana je konačna i nije moguće vršiti novu preraspodjelu u korist rashoda na čiji teret je odobrena preraspodjela.

#### **Član 43.**

##### **(Tekuća rezerva)**

(1) Nepredviđeni rashodi i izdaci za koje u Budžetu nisu planirana sredstva ili rashodi i izdaci za koje se tokom godine pokaže da za njih nisu utvrđena dovoljna sredstva, jer ih pri planiranju Budžeta nije bilo moguće predvidjeti, podmiruju se iz sredstava tekuće rezerve utvrđene Budžetom.

(2) Sredstva tekuće rezerve mogu se odobriti korisnicima, drugim nivoima vlasti i ostalim korisnicima (u daljem tekstu: korisnici sredstava).

(3) Pod nepredviđenim rashodima i izdacima za koje u

Budžetu nisu planirana sredstva ili rashodima i izdacima za koje se tokom godine pokaže da za njih nisu utvrđena dovoljna sredstva, jer ih pri planiranju Budžeta nije bilo moguće predvidjeti, podrazumijevaju se rashodi i izdaci nastali usljed okolnosti koje korisnici sredstava nisu mogli predvidjeti na početku fiskalne godine, ili rashodi i izdaci nastali usljed okolnosti na koje korisnici sredstava nisu mogli uticati, a mogu dovesti do ugrožavanja zdravlja ljudi, materijalnih dobara i funkcionisanja rada kod korisnika sredstava.

#### **Član 44.**

##### **(Korisnici tekuće rezerve)**

(1) Pod drugim nivoima vlasti u smislu člana 43. stav (2) ovog zakona podrazumijevaju se općine i gradovi na području Kantona.

(2) Pod ostalim korisnicima u smislu člana 43. stav (2) ovog zakona podrazumijevaju se svi ostali korisnici koji koriste sredstva Budžeta, a nisu definisani kao korisnici ili drugi nivoi vlasti.

#### **Član 45.**

##### **(Kriteriji za korištenje tekuće rezerve)**

(1) Korisnicima se može odobriti korištenje sredstava tekuće rezerve ukoliko ispunjavaju jedan od sljedećih kriterija:

- a) finansiranje nepredviđenih rashoda i izdataka za tekuću fiskalnu godinu,
- b) finansiranje nepredviđenih izdataka za sponzorstva i pokroviteljstva, kada se kao sponzor ili pokrovitelj pojavljuje Vlada Kantona.
- c) sufinansiranje odobrenih programa/projekata finansiranih iz drugih izvora, a koji se realizuju sa domaćim ili inostranim partnerom ili drugim nivoima vlasti.

(2) Drugim nivoima vlasti može se odobriti korištenje sredstava tekuće rezerve u slučaju elementarnih nepogoda i drugih prirodnih nesreća, pod uslovom da je stanje elementarne nepogode proglašeno od strane nadležnog organa.

(3) Ostalim korisnicima može se odobriti korištenje sredstava tekuće rezerve u slučaju:

- a) finansiranje dijela nepredviđenih troškova za učešće pojedinaca i udruženja građana ili sportskih klubova sa područja Kantona na svjetskim, evropskim i državnim takmičenjima, manifestacijama i skupovima, ako se takvo učešće nije moglo predvidjeti na početku fiskalne godine,
- b) finansiranje nepredviđenih projekata od interesa za Kanton,
- c) u drugim slučajevima kada Vlada Kantona utvrdi da je korištenje sredstava tekuće rezerve za pokriće nepredviđenih troškova ostalih korisnika od interesa za Kanton.

(4) Sredstva tekuće rezerve ne mogu se koristiti za pozajmljivanje.

#### **Član 46.**

##### **(Odluka o korištenju tekuće rezerve)**

(1) Odluku o korištenju sredstava tekuće rezerve donosi Vlada Kantona, u skladu s kriterijima za upotrebu sredstava tekuće rezerve utvrđenih ovim zakonom, na prijedlog Ministarstva finansija.

(2) Prijedlog odluke resornog ministarstva iz stava (1) ovog člana obavezno sadrži obrazloženje razloga za korištenje sredstava tekuće rezerve u skladu s kriterijima utvrđenim članom 45. ovog zakona.

(3) Ministarstvo finansija obavezno tromjesečno izvještava Vladu Kantona o korištenju sredstava tekuće rezerve.

(4) Vlada Kantona polugodišnje izvještava Skupštinu Kantona o korištenju sredstava tekuće rezerve.

**Član 47.****(Usmjeravanje prihoda)**

Prihodi ostvareni iznad planiranih Budžetom mogu se rasporediti posebnom odlukom Vlade Kantona u tekuću rezervu ili za pokriće deficita, a ako se ostvare 5% iznad planiranih rasporedit će se izmjenama i dopunama Budžeta (rebalansom Budžeta).

**Član 48.****(Planiranje likvidnosti)**

(1) Ministarstvo finansija izrađuje planove novčanih tokova iz člana 34. ovog zakona, kojima se predviđa priliv i odliv sredstava na JRT, a koji predstavljaju osnovu za izvršavanje Budžeta.

(2) Pri izradi planova novčanih tokova Ministarstvo finansija koristi informacije iz različitih izvora:

- a) krajnje stanje JRT-a za prethodni period,
- b) predviđanja svih prihoda i primitaka na JRT,
- c) predviđanja svih rashoda i izdataka,
- d) predviđanja servisiranja dugova,
- e) projekcije inostrane pomoći i pozajmljivanja i
- f) kretanja ključnih makroekonomskih parametara.

(3) Plan novčanih tokova razmatra i odobrava Odbor za likvidnost Budžeta, kojeg imenuje ministar finansija. Na odobreni plan novčanih tokova saglasnost daje Vlada Kantona.

(4) U skladu s planom novčanih tokova i raspoloživim novčanim sredstvima vrši se alokacija sredstava korisnicima, za izmirenje obaveza. Vlada Kantona može zadužiti Ministarstvo finansija da poveća alokaciju sredstava korisnicima iznad odobrenog Plana novčanih tokova.

(5) Ukoliko je planiran deficit, u Plan novčanih tokova uključuju se i preporuke o potrebnim korektivnim mjerama.

(6) Izuzetno, u slučaju nedostatka novčanih sredstava za isplatu bruto plaća zaposlenih kod korisnika, Vlada Kantona, na prijedlog Ministarstva finansija, može donijeti odluku o pozajmljivanju neangažovanih novčanih sredstava sa podračuna otvorenih u okviru JRT-a u iznosu nedostajućeg dijela sredstava.

(7) Nakon realizacije odluke iz stava (6) ovog člana, Ministarstvo finansija će izvršiti povrat pozajmljenih novčanih sredstava iz narednih tekućih priliva sa transakcijskog računa u korist podračuna sa kojih su novčana sredstva pozajmljena.

(8) U periodu dok traje povrat pozajmljenih novčanih sredstava, moguće je vršiti plaćanje obaveza koje su utvrđene u odluci Vlade Kantona iz stava (6) ovog člana.

**Član 49.****(Obezbjedenje sredstava korisnicima)**

(1) Sredstva Budžeta obezbjeđuju se korisnicima koji su u Posebnom dijelu Budžeta određeni za nosioce sredstava na pojedinim pozicijama.

(2) Korisnici sredstva koriste samo za namjene koje su određene Budžetom, i to do iznosa alociranog za tog korisnika.

**Član 50.****(Investiranje i oročavanje sredstava)**

(1) Ministarstvo finansija može investirati bilo koji iznos sredstava koji je na JRT-u, a koji trenutno nije potreban za izvršavanje planiranih budžetskih obaveza.

(2) Investiranje neangažovanih javnih sredstava iz stava (1) ovog člana izvršavat će se isključivo u svrhu povećanja resursa Budžeta u skladu s uslovima propisanim Zakonom o investiranju javnih sredstava („Službene novine Federacije BiH”, br. 77/04 i 48/08).

(3) Svi prihodi koji su stečeni investiranjem javnih sredstava iz stava (1) ovog člana uplaćuju se na JRT.

(4) Ministarstvo finansija može kod izabrane transakcijske

banke oročiti slobodna novčana sredstva koja se nalaze na JRT-u na period koji ne može biti duži od kraja fiskalne godine.

(5) Svi prihodi koji su stečeni oročavanjem slobodnih sredstava iz stava (4) ovog člana uplaćuju se na JRT.

**Član 51.****(Povrat sredstava u Budžet)**

(1) Ukoliko se naknadno utvrdi da je isplata iz Budžeta izvršena nezakonito i/ili nenamjenski, korisnik je dužan odmah zahtijevati povrat budžetskih sredstava na JRT.

(2) Ako se budžetskim nadzorom utvrdi da su sredstva korištena suprotno zakonu, ministar finansija donosi rješenje o povratu sredstava na JRT.

**VII. ZADUŽIVANJE I UPRAVLJANJE DUGOM****Član 52.****(Kratkoročno zaduženje)**

(1) Finansijske obaveze preuzete u ime i za račun Kantona, u skladu sa zakonom i drugim propisima, čine dug Kantona i obaveze su Kantona.

(2) Kanton se može kratkoročno zadužiti unutar države u svrhu privremenog finansiranja deficita nastalog iz gotovinskog toga.

(3) Kratkoročni dug iz stava (2) ovog člana otplatit će se u tekućoj fiskalnoj godini i niti u jednom vremenskom periodu u toku tekuće fiskalne godine ne smije preći 5% ostvarenih prihoda bez primitaka, u prethodnoj fiskalnoj godini.

**Član 53.****(Stvaranje obaveza)**

(1) Kanton može stvoriti obaveze po osnovu zaduživanja ili izdavanja garancija.

(2) O visini zaduživanja i garancijama odlučuje Skupština Kantona, na prijedlog Vlade Kantona

(3) Otplata duga Kantona predstavlja obavezu Kantona.

(4) Dug grada ili općina sa područja Kantona ne predstavlja direktnu ili indirektnu obavezu Kantona, izuzev ukoliko Ministarstvo finansija, u skladu s odlukom Skupštine Kantona, nije izdalo garancije u vezi s kreditom grada ili općine.

**Član 54.****(Svrhe zaduženja)**

Kanton se može zadužiti u sljedeće svrhe:

- a) za finansiranje budžetskog deficita,
- b) za finansiranje kapitalnih investicija i posebnih programa odobrenih od Skupštine Kantona,
- c) za refinansiranje ukupnog ili dijela neizmirenog duga Kantona,
- d) plaćanje po osnovu izdatih garancija Kantona u potpunosti ili djelimično u slučajevima kada zajmoprimac ne isplati svoje obaveze.

**Član 55.****(Svrhe izdavanja garancija)**

(1) Kanton može izdati garanciju samo za finansiranje kapitalnih investicija i samo pod uslovom da je pravno lice, koje je zajmoprimac sredstava, pravno lice čiji je većinski vlasnik Kanton ili je pod nadzorom Kantona.

(2) Kanton može izdati garanciju za finansiranje kapitalne investicije i za pravno lice koje je zajmoprimac sredstava, čiji je većinski vlasnik grad ili općina, ili pod nadzorom grada ili općine, ukoliko se kapitalna investicija finansira iz sredstava međunarodnih finansijskih institucija, sve pod uslovom da garanciju izda Bosna i Hercegovina i Federacija Bosne i Hercegovine.

(3) Prije izdavanja garancije iz stava (2) ovog člana, grad ili općina na čijem području će se realizovati kapitalna investicija,

obavezna je prethodno dostaviti izdatu garanciju gradskog ili općinskog vijeća.

(4) Ministarstvo finansija vodi popis duga, izdatih jamstava i zajmova, a evidentira ih u sistemu Glavne knjige Trezora.

(5) Vlada Kantona donosi odluku o izdavanju garancije Kantona.

(6) Skupština Kantona odobrava izdavanje garancija Kantona.

#### Član 56.

##### (Instrumenti obezbjeđenja)

(1) O obliku zajma i vrsti instrumenta obezbjeđenja odlučuje Vlada Kantona.

(2) Ugovore o zaduživanju Budžeta i izdavanju garancija potpisuje ministar finansija.

(3) Na sva pitanja koja nisu uređena ovim zakonom, a koja se odnose na dug i garancije Kantona, primjenjuju se odredbe Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH”, br: 86/07, 24/09, 44/10 i 30/16).

#### Član 57.

##### (Način pokrivanja deficita)

(1) Obaveze, uknjižene a neizmirene do 31.12.2024. godine, po osnovu rashoda i izdataka, mogu se izvršavati na teret prihoda i primitaka tekuće fiskalne godine.

(2) Obaveze, uknjižene a neizmirene do 31.12.2024. godine, po osnovu rashoda i izdataka, mogu se izvršavati i na sljedeće načine:

a) zaduženjem kod MMF-a, putem ugovora o supsidijarnom zaduženju,

b) zaduženjem kod komercijalnih banaka ili

c) izdavanjem vrijednosnih papira.

### VIII. RAČUNOVODSTVO, NADZOR I IZVJEŠTAVANJE BUDŽETA

#### Član 58.

##### (Odgovornost za stvaranje obaveza)

(1) Ministri i rukovodioci korisnika i drugih tijela odgovorni su za računovodstvo, unutrašnju kontrolu i nadzor svojih ministarstava uključujući korisnike i potrošačke jedinice, odnosno organa i tijela koja spadaju u njihovu nadležnost.

(2) Ministri i rukovodioci korisnika i drugih tijela odgovorni su za svaki nalog za plaćanje, knjiženje i druge naloge date putem Obrasca 1. - zahtjev za nabavku, Obrasca 2. - unos grupe faktura, Obrasca 3. - grupa naloga za knjiženje i Obrasca 4. - dobavljači, propisanih Uputstvom o izvršavanju budžeta sa Jedinstvenog računa trezora („Službene novine Federacije Bosne i Hercegovine”, broj: 34/16).

(3) Ministri i rukovodioci korisnika isključivo su odgovorni za stvaranje obaveza korisnika.

(4) Ministar finansija je, pored upravljanja prihodima i izdacima Ministarstva finansija, odgovoran u ime Vlade Kantona za računovodstvo i unutrašnji nadzor transakcija zaduživanja i izmirenja duga.

#### Član 59.

##### (Računovodstvena načela)

Budžetsko računovodstvo zasniva se na računovodstvenim načelima i vodi po načelu dvojnog knjigovodstva i na računima računskog plana Budžeta.

#### Član 60.

##### (Načelo modificiranog nastanka događaja)

(1) Priznavanje prihoda i primitaka, te rashoda i izdataka putem sistema Glavne knjige trezora provodi se po načelu modificiranog nastanka događaja.

(2) Prihodi i primici priznaju se samo u onom periodu kada su mjerljivi i raspoloživi, to jest kada su uplaćeni na JRT.

(3) Rashodi i izdaci priznaju se na osnovu nastanka poslovnog događaja (obaveze) i u izvještajnom periodu na koji se odnose nezavisno o plaćanju.

#### Član 61.

##### (Budžetski nadzor)

(1) Budžetski nadzor je inspekcijski nadzor zakonitosti, blagovremenosti i namjenskog korištenja budžetskih sredstava kojim se nalažu mjere za otklanjanje utvrđenih nezakonitosti i nepravilnosti.

(2) Budžetski nadzor obuhvata nadzor računovodstvenih, finansijskih i ostalih poslovnih dokumenata subjekata nadzora.

(3) Budžetski nadzor vrši se na način i po procedurama utvrđenim Federalnim zakonom.

#### Član 62.

##### (Interna kontrola i interna revizija)

(1) Ministri su odgovorni za interni nadzor ministarstva i korisnika koji spadaju u njihovu nadležnost.

(2) Korisnici su obavezni urediti sistem interne kontrole u skladu s međunarodnim standardima interne kontrole, kako bi se obezbijedilo da izvršavaju aktivnosti u okviru osnovne djelatnosti.

(3) U skladu s instrukcijama Ministarstva finansija, svi korisnici pripremaju tromjesečne finansijske izvještaje s obrazloženjima koja se odnose na programske rezultate izvršenja Budžeta.

(4) Izvještaji iz stava (3) ovog člana podnose se ministru finansija u roku od 30 dana nakon isteka svakog tromjesečja.

(5) Praćenje i ocjenjivanje sistema internih kontrola vrši interna revizija, u skladu s propisima kojima se reguliše oblast interne revizije.

#### Član 63.

##### (Finansijsko izvještavanje)

(1) Korisnici su dužni dostaviti periodične izvještaje za periode: od 1. januara do 31. marta, od 1. januara do 30. juna i od 1. januara do 30. septembra Ministarstvu finansija u roku 20 dana po isteku obračunskog perioda, a za period od 1. januara do 31. decembra prethodne godine do 28. februara tekuće godine.

(2) Ministarstvo finansija periodične izvještaje za nivo općina i gradova dostavlja Federalnom ministarstvu finansija, a periodični izvještaj za Budžet Kantona dostavlja Vladi Kantona i Federalnom ministarstvu finansija za periode od 1. januara do 31. marta, od 1. januara do 30. juna i od 1. januara do 30. septembra u roku od 30 dana po isteku obračunskog perioda, a za period od 1. januara do 31. decembra prethodne godine do 15. marta tekuće godine.

(3) Korisnici i vanbudžetski fondovi obavezni su izraditi godišnji obračun za prethodnu godinu i dostaviti ih Ministarstvu finansija, najkasnije do kraja februara tekuće godine.

(4) U slučaju da korisnik završni godišnji obračun ne podnese blagovremeno, ministar finansija ima pravo da privremeno obustavi odobrenje rashoda sve dok se ne izvrši prijem godišnjeg obračuna.

#### Član 64.

##### (Godišnji izvještaji)

Ministarstvo finansija dostavlja godišnje izvještaje za budžete općina i gradova i godišnji izvještaj za Budžet Kantona Federalnom ministarstvu finansija do 31. marta tekuće godine za prethodnu godinu.



**Član 65.****(Usvajanje godišnjeg izvještaja o izvršenju Budžeta)**

(1) Ministarstvo finansija dužno je blagovremeno dostaviti Vladi Kantona izvještaj o izvršenju Budžeta za prethodnu godinu, a koji Vlada Kantona podnosi na usvajanje Skupštini Kantona u roku od šest mjeseci od završetka fiskalne godine.

(2) Sadržaj izvještaja iz stava (1) ovog člana mora biti u skladu sa sadržajem i klasifikacijama računa Budžeta, kao i odredbama člana 97. Federalnog zakona.

**Član 66.****(Objavljivanje)**

(1) Budžet, izmjena i dopuna budžeta, te odluka o privremenom finansiranju objavljuje se, na nivou glavne grupe, u „Službenim novinama Tuzlanskog kantona“ u roku od deset dana od dana usvajanja, odnosno donošenja.

(2) Zakon o izvršenju budžeta objavljuje se u „Službenim novinama Tuzlanskog kantona“, u roku od deset dana od dana donošenja.

(3) Svako korištenje tekuće rezerve Vlade Kantona objavljuje se u „Službenim novinama Tuzlanskog kantona“ u roku od deset dana od dana donošenja odluke.

(4) Periodični i godišnji izvještaj o izvršenju Budžeta objavljuje se na službenoj stranici Ministarstva finansija u roku od deset dana od dana njihovog podnošenja.

(5) Odluke o dugu i zaduživanju objavljuju se u „Službenim novinama Tuzlanskog kantona“ u roku od deset dana od dana njihovog donošenja.

**Član 67.****(Javne nabavke)**

Postupak nabavke roba, vršenja usluga i ustupanja radova korisnici su obavezni vršiti u skladu sa odredbama Zakona o javnim nabavkama („Službeni glasnik Bosne i Hercegovine“, br. 39/14, 59/22 i 50/24).

**Član 68.****(Povrat više ili pogrešno uplaćenih prihoda)**

(1) Povrat više ili pogrešno uplaćenih javnih prihoda, koji su uplaćeni u tekućoj fiskalnoj godini na depozitni račun, vrši se sa depozitnog računa Kantona iz tekućeg priliva korisnika prihoda.

(2) Izuzetno od stava 1. ovog člana, ukoliko na vrsti prihoda sa koje se vrši povrat više ili pogrešno uplaćenih prihoda nema tekućeg priliva za realizaciju povrata, u vremenskom razdoblju dužem od 30 dana od dana pravosnažnosti rješenja o odobravanju povrata, ili je vrsta prihoda sa koje se treba izvršiti povrat ugašena, povrat će se izvršiti sa transakcijskog računa korisnika tog prihoda.

(3) Povrat više ili pogrešno uplaćenih javnih prihoda u prethodnim fiskalnim godinama vrši se sa transakcijskog računa Kantona, u pripadajućem iznosu za koji je Kanton bio korisnik prihoda, u skladu sa Zakonom o pripadnosti javnih prihoda u Federaciji Bosne i Hercegovine („Službene novine Federacije BiH“, br. 22/06, 43/08, 22/09, 35/14, 94/15 i 17/22).

(4) Povrat više ili pogrešno uplaćenih javnih prihoda vrši se u skladu s Pravilnikom o procedurama za povrat i preknjiženje više ili pogrešno uplaćenih javnih prihoda sa Jedinstvenog računa trezora Tuzlanskog kantona („Službene novine Tuzlanskog kantona“, br. 14/15, 13/16, 11/22 i 7/24).

**IX. RASPOREĐIVANJE SREDSTAVA****Član 69.****(Raspoređivanje sredstava - Tuzlanski kanton - Skupština - Služba Skupštine)**

Raspored sredstava Tekući transferi - Grantovi pojedincima

i neprofitnim organizacijama - potrošačka jedinica 10010001 predsjednik Skupštine Kantona vrši u skladu s Pravilnikom o kriterijima za korištenje sredstava o kojima odlučuje predsjednik Skupštine Tuzlanskog kantona, broj: 01-02-633-1/06 od 26.09.2006. godine i broj: 01-02-633-3/06 od 01.12.2022. godine, koji je donijela Administrativna komisija Skupštine Tuzlanskog kantona.

**Član 70.****(Raspoređivanje sredstava - Vlada Kantona)**

(1) Raspored sredstava - Tekući transferi neprofitnim organizacijama - Memorijalni centar Srebrenica-Potočari - subanalitika BAX501- potrošačka jedinica 11010001 Vlada Kantona vrši na osnovu donesenih odluka za prethodno dostavljeni projekat Memorijalnog centra Srebrenica-Potočari.

(2) Raspored sredstava - Kapitalni izdaci za korisnike budžetskih sredstava - potrošačka jedinica 11010002, Vlada Kantona vrši u skladu sa svojim donesenim programom.

(3) Sredstva - Troškovi manifestacija - potrošačka jedinica 11010003 - raspoređivat će Vlada Kantona u skladu s programom o određivanju manifestacija od interesa za Kanton, po prethodno utvrđenim kriterijima koje donosi Vlada Kantona, izuzev dijela sredstava namijenjenih za manifestacije koja se odobravaju po pojedinačnim odlukama Vlade Kantona, uz prethodno podnesen zahtjev organizatora manifestacije.

(4) Sredstva - Organizacije i udruženja Tuzlanskog kantona - potrošačka jedinica 11010009 raspoređivat će se po prethodno donesenoj odluci Vlade Kantona o utvrđivanju sredstava namijenjenih nacionalnim kulturnim društvima: Bošnjačka zajednica kulture „Preporod“, Hrvatsko kulturno društvo „Napredak“, Hrvatsko društvo „Hrvatski dom“ Tuzla, Srpsko kulturno prosvjetno društvo „Prosvjeta“, Srpsko građansko vijeće Pokret za ravnopravnost Tuzlanskog kantona, Savez udruženja slijepih građana Tuzlanskog kantona, Savez udruženja građana penzionera/umirovljenika Tuzlanskog kantona, Unija civilnih žrtava rata i porodica civilnih žrtava rata Tuzlanskog kantona, Radničko sportsko društvo „Sloboda“ Tuzla - Kuća sporta, Fondacija Istina Pravda Pomirenje, Crveni križ Tuzlanskog kantona, Udruženje Amica Educa Tuzla, Udruženje porodica i prijatelja djece oboljele od leukemije i drugih malignih oboljenja „Pipol“ Tuzla i Institut za društvena i religijska istraživanja Tuzla.

(5) Raspored sredstava - Sredstva sa escrow računa (namjenska sredstva) - potrošačka jedinica 11010017 vršit će se po programu Vlade Kantona za subvencioniranje dijela kamatne stope privrednim subjektima, sanaciju i restrukturiranje privrednih subjekata, pomoći privrednim subjektima u poteškoćama i kupovinu dionica ili udjela u privrednim društvima iz sredstava ostvarenih u procesu privatizacije i deponovanih kod Razvojne banke Federacije BiH (sredstava na escrow računu). Subvencioniranje dijela kamatne stope privrednim subjektima uredit će se posebnim pravilnikom koji donosi Vlada Kantona na prijedlog resornog ministarstva.

(6) Raspored sredstava - Sredstva za utrošak prihoda od koncesija - namjenska sredstva - potrošačka jedinica 11010018 Vlada Kantona vrši u skladu sa svojim donesenim programom, izuzev sredstava namijenjenih za izmirenje dospjelog kantonalnog dijela obaveza vezanih za realizaciju Programa sufinansiranja Projekta izgradnje kanalizacije i vodosnabdijevanja općine Čelić broj: 02/1-14-11644/11 od 10.06.2011. godine, a koja se odobravaju po posebnim odlukama Vlade Kantona.

(7) Raspored sredstava - Pomoć vjerskim zajednicama - potrošačka jedinica 11010020, ekonomski kod 614300 - Tekući transferi neprofitnim organizacijama i ekonomski kod 615300

– Kapitalni transferi neprofitnim organizacijama, realizuje se u skladu s odlukom o utvrđivanju kriterija, uslova i postupaka za raspodjelu sredstava vjerskim zajednicama i programom Vlade Kantona za raspodjelu sredstava namijenjenih Islamskoj Zajednici - Muftijstvo Tuzlansko, Katoličkoj crkvi za Franjevački samostan „Sv. Petra i Pavla“ Tuzla i za župe na području Tuzlanskog kantona i Srpskoj Pravoslavnoj - Crkvena opština Tuzlanska u Tuzli. Realizacija sredstava utvrđenih programom vršit će se putem pojedinačnih odluka Vlade Kantona, izuzev dijela sredstava namijenjenih za završetak izgradnje Edukativnog centra u kompleksu Behram-begove medrese u Tuzli, koja se odobravaju po posebnoj odluci Vlade Kantona putem Islamske zajednice – Muftijstvo Tuzlansko.

(8) Raspored sredstava - Mediji - potrošačka jedinica 11010022 Vlada Kantona vrši po postupku javnog oglašavanja u skladu s odlukom Vlade Kantona o utvrđivanju kriterija, uslova i postupaka za raspodjelu. Program raspodjele sredstava iz ovog stava donosi Vlada Kantona.

(9) Raspored sredstava - Podrška nedovoljno razvijenim, nerazvijenim i izrazito nerazvijenim općinama - Ekonomski kod 615100 - kapitalni transferi drugim nivoima vlasti i fondovima, potrošačka jedinica 11010023, vrši se u skladu sa Zakonom o podršci nedovoljno razvijenim, nerazvijenim i izrazito nerazvijenim jedinicama lokalne samouprave u Tuzlanskom kantonu („Službene novine Tuzlanskog kantona“, broj: 16/20).

(10) Raspored sredstava - Podrška projektima Kantonalne privredne komore Tuzla - potrošačka jedinica 11010025 Vlada Kantona vrši na osnovu donesenih odluka, po prethodno dostavljenim projektima od Kantonalne privredne komore Tuzla.

#### Član 71.

##### **(Raspoređivanje sredstava - Ministarstvo poljoprivrede, šumarstva i vodoprivrede)**

(1) Raspored sredstava - sredstva vodnih naknada - namjenska sredstva - potrošačka jedinica 14010003 vrši se u skladu s programom ulaganja sredstava vodnih naknada u oblast vodoprivrede na području Kantona koji donosi resorno ministarstvo, izuzev sredstava namijenjenih za izmirenje obaveza po osnovu otplata kredita. Na program iz ovog stava saglasnost daje Vlada Kantona. Na osnovu donesenog programa, resorno ministarstvo donosi pojedinačne odluke o odobranju finansijskih sredstava.

(2) Raspored sredstava - Kantonalna uprava za šumarstvo - potrošačka jedinica 14050001 vršit će se u skladu s programom utroška sredstava, prikupljenih u skladu sa Zakonom o šumama („Službene novine Tuzlanskog kantona“, br. 7/17, 8/20, 3/21 i 14/22), koji donosi resorno ministarstvo na prijedlog Kantonalne uprave za šumarstvo. Na program iz ovog stava saglasnost daje Vlada Kantona. Na osnovu donesenog programa koji obuhvata prikupljena, neutrošena, namjenska i budžetska sredstva (izvor 10), te namjenu i iznose sredstava, Kantonalna uprava za šumarstvo donosi pojedinačne odluke o odobranju finansijskih sredstava na koje saglasnost daje resorno ministarstvo.

(3) Raspored sredstava - Promjena namjene poljoprivrednog zemljišta - namjenska sredstva - potrošačka jedinica 14010001 vrši se u skladu s programom korištenja sredstava prikupljenih od promjene namjene poljoprivrednog zemljišta koji donosi resorno ministarstvo. Na program iz ovog stava saglasnost daje Vlada Kantona. Na osnovu donesenog programa, resorno ministarstvo donosi pojedinačne odluke o odobranju finansijskih sredstava.

(4) Raspored sredstava - Sredstva veterinarstva - potrošačka jedinica 14010001 vrši se u skladu s programom mjera zdravstvene zaštite životinja koji donosi resorno ministarstvo.

Na program iz ovog stava saglasnost daje Vlada Kantona. Na osnovu donesenog programa, resorno ministarstvo donosi pojedinačne odluke o odobranju finansijskih sredstava.

(5) Raspored sredstava - Podrška poljoprivredi i ruralnom razvoju - potrošačka jedinica 14010002 vršit će se u skladu sa Zakonom o novčanim podrškama u poljoprivredi i ruralnom razvoju Tuzlanskog kantona („Službene novine Tuzlanskog kantona“, br. 8/14, 2/16, 4/18, 12/20 i 10/24).

(6) Raspored sredstava - Sredstva od naknade za zakup sportsko-privrednih lovišta - namjenska sredstva - potrošačka jedinica 14010001, vrši se u skladu s programom korištenja sredstava prikupljenih od naknade za zakup sportsko-privrednih lovišta koji donosi resorno ministarstvo. Na program iz ovog stava saglasnost daje Vlada Kantona. Na osnovu donesenog programa, resorno ministarstvo donosi pojedinačne odluke o odobranju finansijskih sredstava.

#### Član 72.

##### **(Raspoređivanje sredstava - Ministarstvo finansija)**

(1) Raspored sredstava - tekući transfer pojedincima - subanalitika GAD501 - refundacija sudskih i administrativnih taksi u postupku upisa u nadležni registar i troškova nabavke fiskalnih uređaja potrošačka jedinica 16010001, vršit će se u skladu sa Uputstvom o postupku refundacije uplaćenih sudskih i administrativnih taksi za upis u nadležni registar i troškova nabavke fiskalnih uređaja.

(2) Uputstvo iz stava (1) ovog člana donosi ministar finansija u roku od 15 dana od dana stupanja na snagu ovog zakona.

#### Član 73.

##### **(Raspoređivanje sredstava - Ministarstvo prostornog uređenja i zaštite okolice)**

(1) Raspored sredstava - ekološke naknade - namjenska sredstva i izvor 10 (budžetska sredstva) - potrošačka jedinica 18010002, vrši se u skladu s donesenim programom resornog ministarstva, izuzev sredstava namijenjenih za izmirenje obaveza po osnovu otplata kredita. Na program iz ovog stava saglasnost daje Vlada Kantona. Na osnovu donesenog programa, resorno ministarstvo donosi pojedinačne odluke o odobranju finansijskih sredstava.

(2) Raspored sredstava - naknade za korištenje podataka premjera i katastra zemljišta, popisnog katastra i katastra komunalnih uređaja - namjenska sredstva - potrošačka jedinica 18010001, vrši se u skladu s donesenim programom resornog ministarstva. Na program iz ovog stava saglasnost daje Vlada Kantona. Na osnovu donesenog programa, resorno ministarstvo donosi pojedinačne odluke o odobranju finansijskih sredstava.

(3) Raspored sredstava - nabavka stalnih sredstava u obliku prava - izvor 10 (budžetska sredstva) - potrošačka jedinica 18010001, vrši se na osnovu ugovora o sufinansiranju nastavka realizacije aktivnosti uklanjanja opasnog otpada iz bivšeg HAK-a zaključenog između nadležnog federalnog ministarstva i resornog ministarstva.

(4) Raspored sredstava - nabavka stalnih sredstava u obliku prava - izvor 10 (budžetska sredstva) - potrošačka jedinica 18010001, vrši se po postupku javne nabavke u skladu sa Zakonom o javnim nabavkama („Službeni glasnik Bosne i Hercegovine“, br. 39/14, 59/22 i 50/24).

#### Član 74.

##### **(Raspoređivanje sredstava - Ministarstvo zdravstva)**

(1) Raspored sredstava - Tekući transferi drugim nivoima vlasti i fondovima, subanalitika JAX100 i JAX200 - potrošačka jedinica 19010001 - vrši resorno ministarstvo, a namijenjena su za plaćanje pruženih zdravstvenih usluga neosiguranim licima s područja Tuzlanskog kantona u skladu s odredbama

Zakona o zdravstvenom osiguranju („Službene novine Federacije BiH“, br. 30/97, 7/02, 70/08, 48/11, 36/18 i 61/22) i plaćanje obaveza nastalih po osnovu organizacije pregleda lica umrlih izvan zdravstvene ustanove - mrtvozorstvo. Raspored sredstava iz ovog stava vrši se posebnom odlukom resornog ministarstva, na koju saglasnost daje Vlada Kantona.

(2) Raspored sredstava - Tekući transferi neprofitnim organizacijama, subanalitika JAX300 - potrošačka jedinica 19010001 - vrši resorno ministarstvo, a namijenjena su za sufinansiranje rada roditeljske kuće u Tuzli. Raspored sredstava izvršit će se na osnovu ugovora o sufinansiranju rada roditeljske kuće, koji će se zaključiti između Ministarstva zdravstva i „Udruženja srce za djecu oboljelu od raka“. Na ugovor iz ovog stava saglasnost daje Vlada Kantona. Ugovorom će se urediti pitanja vremenskog perioda sufinansiranja, vrsta troškova koji se sufinansiraju, prava i obaveze ugovornih strana i druga pitanja od značaja za realizaciju ugovora.

(3) Raspored sredstava - Tekući transferi drugim nivoima vlasti i fondovima, subanalitika JAD101 - potrošačka jedinica 19010001 - vršit će se na osnovu Sporazuma o visini sredstava između Vlade Tuzlanskog kantona i Zavoda zdravstvenog osiguranja Tuzlanskog kantona shodno tački 3. Sporazuma o uređivanju međusobnih prava i obaveza između Vlade Tuzlanskog kantona i Zavoda zdravstvenog osiguranja Tuzlanskog kantona po pitanju oslobodanja od plaćanja premije osiguranja od strane osiguranih lica Zavoda zdravstvenog osiguranja Tuzlanskog kantona u toku 2025. godine i Odluke Vlade Kantona o prihvatanju teksta Sporazuma na prijedlog resornog ministarstva.

(4) Raspored sredstava - Tekući transferi neprofitnim organizacijama i Tekući transferi drugim nivoima vlasti i fondovima, potrošačka jedinica 19010001 - program podrške dobrovoljnim davaocima krvi sa područja Tuzlanskog kantona, vršit će se na osnovu Programa o utvrđivanju uslova, kriterija i postupaka za raspodjelu sredstava koji donosi Vlada Kantona na prijedlog resornog ministarstva. Na osnovu donesenog Programa, resorno ministarstvo potpisat će ugovore sa korisnicima Programa.

(5) Raspored sredstava - Tekući transfer neprofitnim organizacijama, subanalitika NAX400- potrošačka jedinica 19010001, sufinansiranja rada Centra za ranu intervenciju „Mali svijet“ Lukavac, vršit će se na osnovu Programa o utvrđivanju uslova, kriterija i postupaka za raspodjelu sredstava koji donosi Vlada Kantona na prijedlog resornog ministarstva. Na osnovu donesenog Programa Ministarstvo zdravstva će potpisati ugovor sa Centrom za ranu intervenciju „Mali svijet“ Lukavac.

(6) Raspored sredstava - Kapitalni transfer drugim nivoima vlasti - subanalitika JAE103 - potrošačka jedinica 19010001 - vrši se u skladu s odlukom o mjerilima za osiguranje elemenata standarda za 2025. godinu, a u vezi sa članom 13. stav (3) Zakona o zdravstvenoj zaštiti („Službene novine Federacije BiH“, br. 46/10 i 75/13).

#### **Član 75.**

##### **(Raspoređivanje sredstava - Ministarstvo za boračka pitanja)**

(1) Raspored sredstava - Tekući transferi iz dopunskih prava BIZ-a i ostala izdvajanja korisnicima iz oblasti BIZ-a - potrošačka jedinica 20010002, vrši se u skladu s Programom korištenja sredstava za realizaciju dopunskih prava BIZ-a i ostalih izdvajanja korisnicima iz oblasti BIZ-a, koji donosi Vlada Kantona, na prijedlog resornog ministarstva. Sastavni dio Programa čine kriteriji za raspored sredstava za ostala izdvajanja korisnicima iz oblasti BIZ-a. Na osnovu donesenog programa, resorno ministarstvo donosi pojedinačne odluke o odobravanju finansijskih sredstava.

(2) Sredstva - Borački savezi i udruženja Tuzlanskog kantona - potrošačka jedinica 20020001, namijenjena kantonalnim udruženjima pripadnika boračke populacije od posebnog društvenog interesa, raspoređivat će se putem tekućeg mjesečnog transfera u skladu s posebnim propisom koji donosi Vlada Kantona na prijedlog resornog ministarstva, i to za: Savez organizacija porodica šehida i poginulih boraca Tuzlanskog kantona, Savez ratnih vojnih invalida Tuzlanskog kantona, Savez demobilisanih boraca Tuzlanskog kantona, Savez udruga obitelji poginulih i nestalih branitelja u domovinskom ratu Hrvatskog vijeća obrane Tuzlanskog kantona, Udruga hrvatskih vojnih invalida domovinskog rata Tuzlanskog kantona, Udruga dragovoljaca, veterana i nositelja ratnih odličja domovinskog rata HVO Tuzlanskog kantona, Savez dobitnika najvećih ratnih priznanja Tuzlanskog kantona, Jedinstvena organizacija boraca „Unija veterana“ Tuzlanskog kantona, Savez boraca patriotske lige Tuzlanskog kantona, Savez antifašista i boraca narodnooslobodilačkog rata Tuzlanskog kantona, Savez udruženja logoraša Tuzlanskog kantona i Savez udruženja policije Tuzlanskog kantona 1991-1995.

#### **Član 76.**

##### **(Raspoređivanje sredstava - Ministarstvo trgovine, turizma i saobraćaja)**

(1) Raspored sredstava - naknada za obavljene tehnički pregled vozila koja pripada Kantonu - namjenska sredstva - ekonomski kod 614300, tekući transferi neprofitnim organizacijama (funkcija 0451), potrošačka jedinica 22010001 - vrši se u skladu s odlukom o uslovima, kriterijima i postupku raspodjele sredstava koju donosi Vlada Kantona na prijedlog resornog ministarstva, po postupku javnog oglašavanja. Na osnovu donesenih kriterija, a nakon provedenog postupka, resorno ministarstvo donosi odluku o odobravanju finansijskih sredstava korisnicima sa iznosima i namjenom.

(2) Raspored sredstava - Turistička zajednica Tuzlanskog kantona - tekući transfer neprofitnim organizacijama - ekonomski kod 614300, subanalitika MAX100 (funkcija 0473), potrošačka jedinica 22010001 - vrši se u skladu s Programom subvencija za aviosaobraćaj u cilju razvoja turizma koji donosi Vlada Kantona na prijedlog resornog ministarstva i Turističke zajednice Tuzlanskog kantona.

(3) Raspored sredstava - ekonomski kod 614300, transfer neprofitnim organizacijama za projekte u oblasti turizma i ugostiteljstva, subanalitika MAX110 (funkcija 0473), potrošačka jedinica 22010001 vrši se u skladu s odlukom o uslovima, kriterijima i postupku raspodjele sredstava koju donosi Vlada Kantona na prijedlog resornog ministarstva, po postupku javnog oglašavanja. Na osnovu donesenih kriterija, a nakon provedenog postupka, resorno ministarstvo donosi odluku o odobravanju finansijskih sredstava korisnicima s iznosima i namjenom.

(4) Raspored sredstava - Turistička zajednica Tuzlanskog kantona - tekući transfer neprofitnim organizacijama - ekonomski kod 614300, subanalitika MAX120 (funkcija 0473), potrošačka jedinica 22010001 - vrši se na osnovu odluke koju donosi Vlada Kantona na prijedlog resornog ministarstva.

(5) Raspored sredstava - JP Međunarodni aerodrom Tuzla - subvencije javnim preduzećima - ekonomski kod 614400, subanalitika MAD400 (funkcija 0454), potrošačka jedinica 22010001- vrši se odlukom resornog ministarstva, a nakon analize dostavljenog zahtjeva korisnika i izvještaja o namjenskom utrošku sredstava iz prethodnog perioda.

(6) Raspored sredstava - ekonomski kod 614500, subvencija privatnim preduzećima i poduzetnicima za projekte u oblasti turizma i ugostiteljstva, subanalitika MAD503 (funkcija 0473),

potrošačka jedinica 22010001 - vrši se u skladu s odlukom o uslovima, kriterijima i postupku raspodjele sredstava koju donosi Vlada Kantona na prijedlog resornog ministarstva, po postupku javnog oglašavanja. Na osnovu donesenih kriterija, a nakon provedenog postupka, resorno ministarstvo donosi odluku o odobravanju finansijskih sredstava korisnicima sa iznosima i namjenom.

(7) Raspored sredstava - ekonomski kod 615100, kapitalni transferi drugim nivoima vlasti (funkcija 0473) potrošačka jedinica 22010001 - vrši se u skladu s odlukom o uslovima, kriterijima i postupku raspodjele sredstava koju donosi Vlada Kantona na prijedlog resornog ministarstva, po postupku javnog oglašavanja. Na osnovu donesenih kriterija, a nakon provedenog postupka, resorno ministarstvo donosi odluku o odobravanju finansijskih sredstava korisnicima s iznosima i namjenom.

(8) Raspored sredstava - ekonomski kod 615300, kapitalni transferi neprofitnim organizacijama (funkcija 0473) potrošačka jedinica 22010001 - vrši se u skladu s odlukom o uslovima, kriterijima i postupku raspodjele sredstava koju donosi Vlada Kantona na prijedlog resornog ministarstva, po postupku javnog oglašavanja. Na osnovu donesenih kriterija, a nakon provedenog postupka, resorno ministarstvo donosi odluku o odobravanju finansijskih sredstava korisnicima s iznosima i namjenom.

(9) Raspored sredstava - ekonomski kod 615300, sanacija/rehabilitacija lokalnih i nerazvrstanih cesta na području Tuzlanskog kantona, subanalitika MA0002 (funkcija 0451), potrošačka jedinica 22010001 - vrši se odlukom Vlade Kantona na prijedlog resornog ministarstva.

(10) Raspored sredstava - ekonomski kod 615300, izgradnja, rekonstrukcija i sanacija mostova na lokalnim cestama Tuzlanskog kantona, potrošačka jedinica 22010001 - subanalitika MAE202 (funkcija 0451), potrošačka jedinica 22010001 - vrši se odlukom Vlade Kantona na prijedlog resornog ministarstva.

(11) Raspored sredstava - JP Međunarodni aerodrom Tuzla - kapitalni transferi javnim preduzećima JP Međunarodni aerodrome Tuzla - ekonomski kod 615400, subanalitika MAE300 (funkcija 0454), potrošačka jedinica 22010001 - vrši se odlukom Vlade Kantona na prijedlog resornog ministarstva.

(12) Raspored sredstava - naknada za obavljene tehnički pregled vozila koja pripada Kantonu - namjenska sredstva - ekonomski kod 615500 (funkcija 0451) kapitalni transferi privatnim preduzećima i poduzetnicima, potrošačka jedinica 22010001 - vrši se u skladu s odlukom o uslovima, kriterijima i postupku raspodjele sredstava koju donosi Vlada Kantona na prijedlog resornog ministarstva, po postupku javnog oglašavanja. Na osnovu donesenih kriterija, a nakon provedenog postupka, resorno ministarstvo donosi odluku o odobravanju finansijskih sredstava korisnicima sa iznosima i namjenom.

#### Član 77.

##### **(Raspoređivanje sredstava - Ministarstvo za rad, socijalnu politiku i povratak)**

(1) Raspored sredstava - potrošačka jedinica 23010001-tekući transferi drugim nivoima vlasti i fondovima, vrši resorno ministarstvo po posebnim odlukama, na koje saglasnost daje Vlada Kantona, a po programima dostavljenim od JU Službe za zapošljavanje Tuzlanskog kantona.

(2) Raspored sredstava - Podrška povratku prognanih lica - potrošačka jedinica 23040001, vrši se shodno programu o utvrđivanju uslova, kriterija i postupaka za raspodjelu sredstava koji donosi Vlada Kantona na prijedlog resornog ministarstva, po postupku javnog oglašavanja, izuzimajući

sredstva namijenjena za sufinansiranje projekata drugih nivoa vlasti, neprofitnih organizacija i privatnih preduzeća i poduzetnika, za izgradnju infrastrukturnih objekata, subvencije općini Srebrenica za prevoz učenika osnovnih i srednjih škola općine Srebrenica i subvencije troškova terenske ambulante JZU Dom zdravlja Srebrenica, za koje odluke donosi resorno ministarstvo, a saglasnost daje Vlada Kantona, a za readmisiju odluke donosi resorno ministarstvo na osnovu iskazanih potreba i validne dokumentacije općina/gradova.

(3) Raspored sredstava - Materijalno zbrinjavanje socijalno ugroženih - potrošačka jedinica 23040002, vrši se shodno odluci o utvrđivanju programa, uslova, kriterija i postupaka za raspodjelu sredstava koju donosi Vlada Kantona, na prijedlog resornog ministarstva. Na osnovu donesenog programa, resorno ministarstvo donosi odluke o raspodjeli dijela finansijskih sredstava.

(4) Raspored sredstava - Jednokratne pomoći - potrošačka jedinica 23020008, vrši resorno ministarstvo na osnovu donesenog programa raspodjele, na koji saglasnost daje Vlada Kantona.

(5) Raspored sredstava - Materijalno zbrinjavanje lica u stanju socijalne potrebe - potrošačka jedinica 23020009, vrši resorno ministarstvo na osnovu donesenih programa raspodjele na koji saglasnost daje Vlada Kantona, izuzev dijela sredstava namijenjenih HO „Merhamet“ Regionalni odbor Tuzla, za finansiranje narodne kuhinje „Imaret“ Tuzla i dijela sredstava namijenjenih za Centar za djecu sa višestrukim smetnjama „Koraci nade“ Tuzla za rad Centra, koja će se rasporediti na osnovu posebnih odluka resornog ministarstva, na koje saglasnost daje Vlada Kantona i dijela sredstava namijenjenih za isplatu jednokratne novčane pomoći penzionerima sa područja Kantona s najnižom penzijom, koja će se rasporediti na osnovu posebne odluke resornog ministarstva na koju saglasnost daje Vlada Kantona i Sporazuma potpisanog između resornog ministarstva i Federalnog zavoda PIO/MIO Mostar. Na osnovu donesenih programa, resorno ministarstvo donosi odluke o odobravanju finansijskih sredstava koje sadrže podatke o nazivu organizacija i udruženja kojima su odobrena sredstva, nazivu projekta, ciljevima projekta i iznosu odobrenih sredstava.

(6) Raspored sredstava - Subvencija za djecu, učenike i studente - potrošačka jedinica 23020013 vrši resorno ministarstvo na osnovu odredbi člana 80. Zakona o socijalnoj zaštiti, zaštiti civilnih žrtava rata i zaštiti porodice s djecom - drugi prečišćen tekst („Službene novine Tuzlanskog kantona“, br. 18/23 i 7/24).

(7) Raspored sredstava - Subvencija troškova prevencije ovisnosti o drogama, prevencije intervencije i resocijalizacije maloljetničke delikvencije - potrošačka jedinica 23020019, vrši resorno ministarstvo na osnovu donesenog programa raspodjele. Sastavni dio programa čine kriteriji za raspored sredstava. Na program iz ovog stava saglasnost daje Vlada Kantona. Na osnovu donesenog programa, resorno ministarstvo donosi odluke o odobravanju finansijskih sredstava koje sadrže podatke o nazivu organizacija i udruženja kojima su odobrena sredstva, nazivu projekta, ciljevima projekta i iznosu odobrenih sredstava.

(8) Raspored sredstava - Podrška pronatalitetnoj politici Kantona - potrošačka jedinica 23020023, vršit će se u skladu s odredbama člana 88. Zakona o socijalnoj zaštiti, zaštiti civilnih žrtava rata i zaštiti porodice s djecom - drugi prečišćen tekst („Službene novine Tuzlanskog kantona“, br. 18/23 i 7/24).

(9) Raspored sredstava - Dječije selo mira Turija - potrošačka jedinica 23020007, za refundaciju utrošenih sredstava za struju i plin, vršit će se na osnovu ispostavljenih računa za struju i plin od Dječijeg sela mira Turija, a za refundaciju carinskih troškova

na osnovu odluke resornog ministarstva, na koju saglasnost daje Vlada Kantona.

#### Član 78.

##### **(Raspoređivanje sredstava - Ministarstvo obrazovanja i nauke)**

(1) Sredstva - Obilježavanje jubileja i održavanje manifestacija u obrazovanju - potrošačka jedinica 24010020, raspoređivat će se u skladu sa kriterijima koje donosi resorno ministarstvo, a na koje saglasnost daje Vlada Kantona. Na osnovu donesenih kriterija, resorno ministarstvo donosi odluku o odobravanju finansijskih sredstava.

(2) Sredstva - Nauka - potrošačka jedinica 24010019, rasporedit će se na osnovu propisa ministra obrazovanja i nauke, uz prethodno pribavljenu saglasnost Vlade Kantona, u skladu s odredbama člana 16. stavovi (1) i (3) Zakona o naučnoistraživačkom radu („Službene novine Tuzlanskog kantona“, br. 14/17, 8/21, 16/22, 9/23 i 3/24). Realizacija sredstava iz ovog stava, fakultetima/akademiji Univerziteta u Tuzli vršit će se putem interne transakcije prenosom sredstava u operativnom planu, po prethodno podnesenom zahtjevu fakulteta/akademije. Prenos se vrši na potrošačku jedinicu 24040001 - Univerzitet u Tuzli i ekonomske kodove u skladu s dodjeljenom namjenom sredstava, uz umanjeње sredstava u operativnom planu na potrošačkoj jedinici 24010019 - Nauka. Ministarstvo finansija dostavlja obavijest o unosu sredstava u operativni plan resornom ministarstvu, Univerzitetu u Tuzli i fakultetu/akademiji.

(3) Sredstva - Predškolski odgoj i obrazovanje - potrošačka jedinica 24010023, raspoređivat će se u skladu s kriterijima koje donosi resorno ministarstvo, a na koje saglasnost daje Vlada Kantona. Na osnovu donesenih kriterija, resorno ministarstvo donosi odluku o odobravanju finansijskih sredstava, a u skladu s odredbama Zakona o predškolskom odgoju i obrazovanju - prečišćeni tekst („Službene novine Tuzlanskog kantona“, br. 10/20 i 5/22).

(4) Sredstva - Subvencioniranje troškova ishrane i smještaja studenata - potrošačka jedinica 24010024, raspoređivat će se na osnovu odluke o sufinansiranju smještaja i ishrane studenata sa područja Kantona u studentskim centrima u Federaciji BiH, koju na prijedlog resornog ministarstva donosi Vlada Kantona

(5) Sredstva - Fond za kreditiranje studenata - potrošačka jedinica 24010025, raspoređivat će se u skladu s donesenim rješenjima o povratu sredstava.

(6) Sredstva - Stipendiranje učenika srednjih škola za deficitarna zanimanja - potrošačka jedinica 24010026, raspoređivat će se po postupku javnog oglašavanja u skladu s kriterijima koje donosi Vlada Kantona na prijedlog resornog ministarstva.

(7) Raspored sredstava - Tekući transferi pojedincima - subanalitika OBD205 - stipendiranje posebno nadarenih učenika osnovnih škola - potrošačka jedinica 24010018, vršit će se po posebnim kriterijima koje donosi ministar u skladu sa članom 14a. stav (1) Zakona o osnovnom odgoju i obrazovanju - prečišćeni tekst („Službene novine Tuzlanskog kantona“, br. 10/20, 8/21, 11/21, 22/21, 5/22, 6/22 - presuda US FBiH, 10/22, 11/22, 9/23 - presuda US FBiH i 12/23).

(8) Raspored sredstava - Tekući transferi pojedincima - subanalitika OCD206 - stipendiranje posebno nadarenih učenika srednjih škola - potrošačka jedinica 24010018, vršit će se po posebnim kriterijima koje donosi ministar u skladu sa članom 160. stav (2) Zakona o srednjem obrazovanju i odgoju - prečišćeni tekst („Službene novine Tuzlanskog kantona“, br. 10/20, 11/20, 8/21, 11/21, 22/21, 5/22, 6/22 - presuda US FBiH, 10/22, 11/22, 9/23 i 12/23).

(9) Raspored sredstava - Tekući transferi pojedincima

- subanalitika ODD207 - stipendiranje posebno nadarenih redovnih studenata javne visokoškolske ustanove - potrošačka jedinica 24010018, vršit će se na osnovu propisa ministra kojim se bliže uređuju uslovi, kriteriji i postupak dodjele stipendija nadarenim redovnim studentima javne visokoškolske ustanove kao i ciklus studija za koji se stipendije dodjeljuju u skladu sa članom 106. Zakona o visokom obrazovanju - prečišćeni tekst („Službene novine Tuzlanskog kantona“, br. 21/21, 22/21, 5/22, 11/22 i 16/22).

(10) Raspored sredstava - Tekući transferi pojedincima - subanalitika OAD200 - stipendiranje učenika osnovnih i srednjih škola sa invaliditetom i redovnih studenata sa invaliditetom javne visokoškolske ustanove - potrošačka jedinica 24010018, vršit će se na osnovu posebnih kriterija koje donosi ministar na osnovu člana 14a. stav (2) Zakona o osnovnom odgoju i obrazovanju - prečišćeni tekst („Službene novine Tuzlanskog kantona“, br. 10/20, 8/21, 11/21, 22/21, 5/22, 6/22 - presuda US FBiH, 10/22, 11/22, 9/23 - presuda US FBiH i 12/23), člana 160. stav (3) Zakona o srednjem obrazovanju i odgoju - prečišćeni tekst („Službene novine Tuzlanskog kantona“, br. 10/20, 11/20, 8/21, 11/21, 22/21, 5/22, 6/22 - presuda US FBiH, 10/22, 11/22, 9/23 i 12/23) i člana 106. stav (5) Zakona o visokom obrazovanju - prečišćeni tekst („Službene novine Tuzlanskog kantona“, br. 21/21, 22/21, 5/22, 11/22 i 16/22).

#### Član 79.

##### **(Raspoređivanje sredstava - Kantonalna uprava civilne zaštite)**

(1) Sredstva - grantovi drugim nivoima vlasti - potrošačka jedinica 26010001, raspoređivat će se na osnovu odluka Vlade Kantona na prijedlog Kantonalne komisije za procjenu šteta od prirodnih i drugih nesreća u skladu sa članom 3. tačka a) i članom 5. tačka a) Odluke o postupku i uslovima za dodjelu jednokratne novčane pomoći općinama Tuzlanskog kantona za otklanjanje šteta nastalih od prirodnih i drugih nesreća („Službene novine Tuzlanskog kantona“, br. 6/12, 2/21 i 12/24).

(2) Sredstva - namjenska sredstva za zaštitu od požara i vatrogastvo - potrošačka jedinica 26010001, raspoređivat će se na osnovu Plana korištenja finansijskih sredstava za zaštitu od požara i vatrogastvo, koji donosi Kantonalna uprava civilne zaštite, uz saglasnost Vlade Kantona, a u skladu sa članom 4. stav (1) Odluke o korištenju finansijskih sredstava ostvarenih po osnovu naknade iz premije osiguranja imovine od požara i prirodnih i sredstava od naplaćene funkcionalne premije osiguranja, koja se odnosi na osiguranje motornih vozila („Službene novine Tuzlanskog kantona“, broj: 12/24). Na osnovu donesenog Plana, pojedinačne odluke donosi Kantonalna uprava civilne zaštite, po proceduri propisanoj navedenom odlukom.

(3) Sredstva - namjenska sredstva - posebna naknada za zaštitu od prirodnih i drugih nesreća - potrošačka jedinica 26010002, raspoređivat će se na osnovu Plana korištenja sredstava posebne naknade za zaštitu od prirodnih i drugih nesreća, koji donosi Kantonalna uprava civilne zaštite uz pribavljeno mišljenje Kantonalnog štaba civilne zaštite. Odluke o odobravanju finansijskih sredstava će donositi Kantonalni štab civilne zaštite odnosno Vlada Kantona u skladu s nadležnostima utvrđenim u Odluci o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine Federacije BiH“, br. 4/12, 80/13 i 20/20), Odluci o postupku i uslovima za dodjelu jednokratne novčane pomoći općinama Tuzlanskog kantona za otklanjanje šteta nastalih od prirodnih i drugih nesreća („Službene novine Tuzlanskog kantona“, br. 6/12, 2/21 i 12/24) i Odluci o dodjeli finansijske pomoći

gradovima i općinama iz sredstava posebne naknade za zaštitu od prirodnih i drugih nesreća („Službene novine Tuzlanskog kantona“, broj: 1/24).

#### Član 80.

##### (Raspoređivanje sredstava - Ministarstvo privrede)

(1) Raspored sredstava - Intervencije javnim preduzećima i privrednim društvima - potrošačka jedinica 31010002, vrši se u skladu s donesenim programom resornog ministarstva po prethodno utvrđenim kriterijima resornog ministarstva. Na program iz ovog člana saglasnost daje Vlada Kantona. Resorno ministarstvo donosi pojedinačne odluke o odobravanju finansijskih sredstava.

(2) Raspored sredstava - Podrška razvoju Kantona - potrošačka jedinica 31010003, vrši se u skladu s programom o utvrđivanju uslova, kriterija i postupaka za raspodjelu sredstava koji donosi Vlada Kantona, na prijedlog resornog ministarstva, po postupku javnog oglašavanja, izuzev sredstava planiranih na ekonomskom kodu 615300 - Kapitalni transferi neprofitnim organizacijama, a koja su namijenjena finansiranju i/ili sufinansiranju projekata u kojima je Ministarstvo privrede ili Vlada Kantona partner. Na osnovu donesenog programa, resorno ministarstvo donosi pojedinačne odluke o odobravanju finansijskih sredstava. Raspored sredstava planiranih na ekonomskom kodu 613 900 - Ugovorene i druge posebne usluge vrši se u skladu sa Zakonom o javnim nabavkama („Službeni glasnik Bosne i Hercegovine“, br. 39/14, 59/22 i 50/24).

(3) Raspored sredstava - Podrška razvoju Kantona - potrošačka jedinica 31010003, ekonomski kod 615100 - kapitalni transferi drugim nivoima vlasti i fondovima, vrši se u skladu sa programom o utvrđivanju uslova, kriterija i postupaka za raspodjelu sredstava koji donosi Vlada Kantona, na prijedlog resornog ministarstva, po postupku javnog oglašavanja. Na osnovu donesenog programa, resorno ministarstvo donosi pojedinačne odluke o odobravanju finansijskih sredstava, na koje saglasnost daje Vlada Kantona.

#### Član 81.

##### (Raspoređivanje sredstava - Ministarstvo za kulturu, sport i mlade)

(1) Sredstva - Tjelesna kultura i sport - potrošačka jedinica 32010002, raspoređivat će se u skladu s odlukom o utvrđivanju uslova, kriterija i postupka za raspodjelu sredstava koju donosi Vlada Kantona na prijedlog resornog ministarstva i na osnovu koje resorno ministarstvo donosi pojedinačne odluke o odobravanju finansijskih sredstava korisnicima, izuzev dijela sredstava namijenjenih za sufinansiranje stručnih poslova Sportskog saveza Tuzlanskog kantona iz člana 29. stavovi (1) i (2) Zakona o sportu - prečišćeni tekst („Službene novine Tuzlanskog kantona“, broj: 11/21) koja se odobravaju po posebnoj odluci resornog ministarstva, uz prethodno podnesen zahtjev Sportskog saveza Tuzlanskog kantona na osnovu Uputstva o korištenju i utrošku sredstava koje donosi resorno ministarstvo. Odlukom iz ovog stava utvrđuje se iznos sredstava koja se raspoređuju putem javnog oglašavanja.

(2) Sredstva - Podrška u oblasti kulture - potrošačka jedinica 32010003, raspoređivat će se u skladu s odlukom o utvrđivanju uslova, kriterija i postupka za raspodjelu sredstava koju donosi Vlada Kantona na prijedlog resornog ministarstva i na osnovu koje resorno ministarstvo donosi pojedinačne odluke o odobravanju finansijskih sredstava korisnicima. Odlukom iz ovog stava utvrđuje se iznos sredstava koja se raspoređuju putem javnog oglašavanja.

(3) Sredstva - Podrška mladima - potrošačka jedinica 32010004, raspoređivat će se u skladu s odlukom o utvrđivanju uslova, kriterija i postupka za raspodjelu sredstava koju

donosi Vlada Kantona na prijedlog resornog ministarstva i na osnovu koje resorno ministarstvo donosi pojedinačne odluke o odobravanju finansijskih sredstava korisnicima. Odlukom iz ovog stava utvrđuje se iznos sredstava koja se raspoređuju putem javnog oglašavanja.

#### Član 82.

##### (Raspoređivanje sredstava - Univerzitet u Tuzli)

Raspored sredstava - sufinansiranje aktivnosti udruženja „Studentski parlament Univerziteta u Tuzli“ - potrošačko mjesto 24040001 - Univerzitet u Tuzli, raspoređivat će se na osnovu odluke o sufinansiranju aktivnosti udruženja „Studentski parlament Univerziteta u Tuzli“, koju na osnovu zahtjeva Studentskog parlamenta Univerziteta u Tuzli donosi rektor JU Univerzitet u Tuzli.

#### Član 83.

##### (Sredstva podrške iz Budžeta Federacije BiH)

(1) Sredstva podrške iz Budžeta Federacije Bosne i Hercegovine za 2024. godinu planirat će se na prihodovnoj strani Budžeta - ekonomski kod - primljeni tekući transferi od Federacije i rasporedit će se na rashodovnoj strani Budžeta u izvoru 50 (transferi) u Posebnom dijelu Budžeta.

(2) Sredstva iz stava (1) ovog člana koristit će se u skladu s namjenama utvrđenim ugovorom o dodjeli podrške iz Budžeta Federacije Bosne i Hercegovine za 2024. godinu.

(3) Sredstva iz stava (2) ovog člana izvršavat će se u skladu s rashodima i izdacima planiranim u Posebnom dijelu Budžeta, a na osnovu odluke koju donosi Vlada Kantona, na prijedlog Ministarstva finansija.

(4) Korisnici mogu koristiti sredstva podrške iz ovog člana nakon donošenja odluke iz stava (3) ovog člana.

#### Član 84.

##### (Objavljivanje programa i kriterija)

Programi i kriteriji utvrđeni članovima od 70. do 78. i članovima 80. i 81. objavljuju se u „Službenim novinama Tuzlanskog kantona“.

### X. KAZNENE ODREDBE

#### Član 85.

##### (Prekršajna odgovornost)

(1) Odgovorno lice korisnika, nosilac izvršne vlasti, kao i drugo lice odgovorno za Budžet, kaznit će se za prekršaj saglasno odredbama članova 102. i 103. Federalnog zakona.

(2) Odgovorno lice korisnika, nosilac izvršne vlasti, kao i drugo lice odgovorno za Budžet, kaznit će se za prekršaj saglasno odredbama člana 103. stav 1. tačke 1. i 2. Federalnog zakona ako izvrši novo zapošljavanje suprotno članu 38. stavovi (6), (7), (8) i (9) ovog zakona.

(3) Odgovorno lice korisnika, nosilac izvršne vlasti, kao i drugo lice odgovorno za Budžet, kaznit će se za prekršaj saglasno odredbama člana 103. stav 1. tačke 1. i 2. Federalnog zakona ako ugovori avansno plaćanje suprotno članu 36. stav (7) ovog zakona.

### XI. PRELAZNE I ZAVRŠNE ODREDBE

#### Član 86.

##### (Primjena drugih zakona i propisa)

(1) Na sva pitanja koja nisu regulisana ovim zakonom, a tiču se načina izrade, planiranja, sadržaja, donošenja, izvršavanja Budžeta, zaduživanja i garancija, upravljanja javnim dugom, finansijskom i nefinansijskom imovinom, prava i obaveza korisnika, ovlaštenja Vlade Kantona, Ministarstva finansija i ministra finansija, računovodstva, nadzora i revizije kao i izvještavanja Budžeta, te drugih pitanja primjenjivat će se

odredbe Federalnog zakona.

(2) Na najviše iznose naknada za rad u upravnim i nadzornim odborima i drugim organima u privrednim društvima sa većinskim državnim kapitalom prema kojima prava upravljanja vrši Vlada Kantona, javnim preduzećima čiji je osnivač Kanton, javnim i drugim ustanovama, zavodima, agencijama, čiji je osnivač odnosno koji su u nadležnosti Kantona i drugim tijelima i vijećima čiji se materijalni uslovi za rad obezbjeđuju iz sredstava Budžeta Kantona primjenjuje se Odluka o utvrđivanju najvišeg iznosa naknada za rad u organima regulisanih organa čiji je osnivač/suosnivač Tuzlanski kanton („Službene novine Tuzlanskog kantona“, br. 12/24 i 14/24).

#### Član 87.

##### (Primjena podzakonskih akata)

U slučaju da se tokom važenja ovog zakona donesu podzakonski akti koji se odnose na primjenu ovog zakona, primjenjuju se akti saglasno odredbama u njima o njihovom stupanju na snagu.

#### Član 88.

##### (Stupanje na snagu)

Ovaj zakon stupa na snagu danom objavljivanja u „Službenim novinama Tuzlanskog kantona“, a primjenjuje se od 01.01.2025. godine.

BOSNA I HERCEGOVINA  
Federacija Bosne i Hercegovine  
TUZLANSKI KANTON  
SKUPŠTINA

Predsjednik  
Skupštine Tuzlanskog kantona

Broj: 01-02-563-11/24  
Tuzla, 27.12.2024. godine

Žarko Vujović, v.r.

1117

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), člana 23. stavovi 1. i 5. Zakona o prostornom planiranju i korištenju zemljišta na nivou Federacije Bosne i Hercegovine („Službene novine Federacije BiH“, br. 2/06, 72/07, 32/08, 4/10, 13/10, 45/10, 85/21, 92/21 i 72/24) i člana 41. Zakona o prostornom uređenju i građenju („Službene novine Tuzlanskog kantona“, br. 6/11, 4/13, 15/13, 3/15, 2/16, 4/17, 22/22 i 20/23), na prijedlog Vlade Tuzlanskog kantona, Skupština Tuzlanskog kantona, na sjednici održanoj 27.12.2024. godine, donosi

## ODLUKU

### o izmjenama Odluke o pristupanju izradi Prostornog plana za područje Tuzlanskog kantona za period 2025-2045.

#### Član 1.

U Odluci o pristupanju izradi Prostornog plana za područje Tuzlanskog kantona za period 2025-2045. („Službene novine Tuzlanskog kantona“, broj: 7/23) član 11. mijenja se i glasi:

„Član 11.

(Rok za izradu Prostornog plana)

- (1) Rok za izradu Prostornog plana je 31.12.2025. godine.
- (2) Rok za izradu teče od dana zaključivanja Ugovora za izradu Prostornog plana s izabranim nosiocem izrade Prostornog plana (u daljem tekstu: nosilac izrade).“

#### Član 2.

Član 12. mijenja se i glasi:

„Član 12.

(Rokovi za izradu Prostornog plana po fazama)

Utvrđuju se rokovi po fazama izrade Prostornog plana kako slijedi:

- a) I. FAZA: priprema i izrada prostorne osnove
  - 1) Prostorna osnova – ažuriranje stanja i izrada osnovne koncepcije prostornog razvoja za područje na koje se odnosi Prostorni plan, rok: sedam mjeseci od dana zaključivanja ugovora sa nosiocem izrade;
  - 2) Razmatranje prostorne osnove s osnovnom koncepcijom od strane Savjeta plana i nosioca pripreme, te usaglašavanje sa subjektima planiranja, rok: tri mjeseca od dana dostave prostorne osnove od strane nosioca izrade;
  - 3) Usvajanje prostorne osnove od strane Savjeta plana i nosioca pripreme, rok: jedan mjesec nakon završetka usaglašavanja sa subjektima planiranja.
- b) II. FAZA: Izrada nacrtu i prijedloga Prostornog plana
  - 1) Izrada nacrtu Prostornog plana, rok: pet mjeseci od usvajanja prostorne osnove sa osnovnom koncepcijom od strane nosioca pripreme;
  - 2) Utvrđivanje nacrtu Prostornog plana, rok: jedan mjesec od dostavljanja nacrtu od strane nosioca izrade;
  - 3) Javna rasprava o nacrtu Prostornog plana, rok: dva mjeseca od utvrđivanja nacrtu;
  - 4) Sumiranje rezultata javne rasprave i izrada prijedloga Prostornog plana, rok: četiri mjeseca;
  - 5) Usvajanje Prostornog plana od strane Skupštine Tuzlanskog kantona (u daljem tekstu: Skupština Kantona), rok: jedan mjesec od dostave prijedloga Prostornog plana.“

#### Član 3.

##### (Stupanje na snagu)

Ova odluka stupa na snagu osmog dana od dana objavljivanja u „Službenim novinama Tuzlanskog kantona“.

BOSNA I HERCEGOVINA  
Federacija Bosne i Hercegovine  
TUZLANSKI KANTON  
SKUPŠTINA

Predsjednik  
Skupštine Tuzlanskog kantona

Broj: 01-02-618-6/24  
Tuzla, 27.12.2024. godine

Žarko Vujović, v.r.

1118

Na osnovu člana 24. stav 1. tačka n) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), a u vezi sa članom 30. Zakona o unutrašnjim poslovima Tuzlanskog kantona („Službene novine Tuzlanskog kantona“, br. 4/10, 5/11, 14/11, 2/12, 8/13, 10/14, 9/15, 13/16, 14/17, 11/18 i 14/18), na prijedlog Komisije za izbor i imenovanja Skupštine Tuzlanskog kantona, Skupština Tuzlanskog kantona, na sjednici održanoj 27.12.2024. godine, donosi

## ODLUKU

### o razrješenju člana Nezavisnog odbora

#### I.

Prihvata se ostavka Adnana Džaferagića i isti se razrješava pozicije člana Nezavisnog odbora.